

祠

部

集

三







集 部 祠  
(三)

撰 至 強

# 祠部集卷十四

表

賀乾元節表

伏以維夏肇和。厥月幾望。訢是穀旦。實生聖人。罄率土以騰歡。比南山而稱壽。恭惟皇帝陛下。神靈天縱。文思日躋。驅民仁壽之中。登治唐虞之表。重熙復旦。載誕膺辰。九五君臨。肇洪基于不拔。億萬天算。綿景祚于無垠。臣無任瞻天樂聖。聳躍歡呼之至。

賀壽聖節表

伏以陽春之首四時。既謹書王之始。月魄之成三日。聿臨誕聖之期。罄海寓以騰歡。擬岡陵而薦壽。恭惟皇帝陛下。心游道秘。躬攬乾綱。晏然享函夏之歸。坐以須大昕之旦。雷霆號令。常必信于四方。天地生成。會靡遺于一物。躋時極治。與古同符。會歲籥之更端。紀電樞之啓瑞。大開路寢。普見羣臣。萬笏稱觴。前祝無疆之算。八音奏雅。間歌既醉之篇。喜動明廷。事光甲觀。臣比司留鑰。久去從聯。未望清光。敢嘆周南之滯。阻陪盛禮。第勤嵩極之呼。

賀同天節表

伏以日御盈旬。風薰報夏。高厚協贊。聖神挺生。慶節誕臨。懽聲四起。伏惟皇帝陛下。纘烈淳耀。宅心太清。

濬堯思之欽明。懋禹躬之勤儉。清和首月。震夙丁時。六五帝以御圖。傳祖宗相授之業。億萬年而享祚。對天地無疆之休。臣適守宮符。阻陪廷著。第罄岡陵之祝。一均海寓之情。

又

粵若首夏。肇惟浹旬。是生聖人。克享天命。傳祖宗相授之業。六五帝以御圖。竭臣子仰祈之心。憶萬年而慶壽。恭惟皇帝陛下。聖躋維日。德肖乎天。發威斷之神明。藏政機于鼓舞。虹流電繞。隨載誕之初辰。日永風薰。亘無窮之協氣。臣欣逢慶節。阻望清光。適廡北土之居留。徒罄南山之頌祝。

又

伏以火德兆時。協契景炎之運。虹光薦瑞。挺生睿哲之姿。慶節誕臨。懽歌四起。伏惟皇帝陛下。德符乾健。治對離明。性循仁義之行。躬發神明之斷。風薰報夏。日御盈旬。厥月清和。維時震夙。觀文太史。喜逢箕翼之明。稱壽羣工。願等岡陵之固。臣跡遙廷著。守在宮符。第虔就望之誠。阻預歡呼之列。

賀明堂大禮表

精饗告成。湛恩隨布。庶邦聞慶。億口騰歡。竊以合宮之祠。歷代不講。肇自有唐之際。迄于我宋之初。議有欲興。寢而弗暇。邈哉墜典。舉在熙辰。恭惟皇帝陛下。紹三聖之休。御九圍之廣。洪造天冒。盛猷日躋。行教化之所未行。紹禮樂之所未紹。祭典咸秩。治具畢張。謂夫布王政者在明堂。爰脩曠制。示民孝者由宗祀。乃奉嚴禋。逮乎訖大禮于總章。坐中天之曉闕。追肆赦于往古。許自新于吾民。靈心顧歆。並貺多福。渙渥

汪濊一清賤。牢人神共和。遐邇均幸。臣跡磨守土。籍遠侍祠。第聽德音之宣。阻觀帝饗之盛。

### 代魏公賀明堂大禮表

伏以聖人爲能于饗帝。並侑五精之神。嚴父莫大于配天。兼風億姓之孝。合宮己事。罄宇蒙休。伏惟皇帝陛下。紹淳耀之烈光。享重熙之盛福。九穀登富。二儀降康。益謹靈心之承。勿專聖德之有。遂沿報本之故事。參講思文之曩篇。既款殊庭。載假清廟。爰及宗祀。維時總章。百靈居歆。六樂備奏。迺薦鬯之夕。昭格神光之靈。痊幣之時。歛蒙天表之應。思共蕃祉。隨宜湛恩。協氣交流。一均雷雨之施。懽心各得。並浹人祇之和。臣等適聽休成。倍深竊忭。方祇留務。異興歎于周南。莫克駿奔。第馳誠于魏北。臣某無任慶幸。抃蹈屏營之至。

### 代沂國公主賀表

伏以聖人爲能于饗帝。並侑五精之神。嚴父莫大于配天。兼風億姓之孝。合宮訖事。罄宇均懽。伏惟皇帝陛下。紹淳耀之烈光。享重熙之盛福。念物蕃俗阜。茲二氣所以降休。謂德大報微。非一純莫可將意。以至徹鼓吹以盡齋容之恪。潔圭幣以謹靈心之承。臣民欣睹盛儀。隨霑渥澤。兒妾夙蒙睿訓。亟被皇慈。側聞玉輅之旋。誠切素襟之忭。

### 代婕妤俞氏才人朱氏賀表

伏以德產至大。惟至虔可以上交。孝思無窮。非昭配不能自達。於穆宗祀。維時總章。人祇普和。恩禮並洽。

伏惟皇帝陛下。暢配天之偉績。秉順帝之清衷。乘涼露之感懷。俸旻穹而謁款。玉帛薦潔。黍稷豐靈。心顧歆。協氣充塞。妾等陶生盛世。玷號後宮。竊觀熙事之成。同慶洪私之布。

賀南郊表

聖人能饗。卽陽位以齋明。上帝居歆。擁神休而孚佑。照臨所暨。鼓舞維均。恭惟皇帝陛下。紹淳耀之烈光。享重熙之盛福。謂俗康物阜。茲二氣所以降休。德大報微。惟一純可以將慤。乃乘長日之至。遙奉圓丘之禋。四海之助各來。九州之力畢獻。高禋上達。昭格靈心之承。協氣旁流。並緣精意之感。祖考參侑。人神普和。臣等顯相待祠。阻觀大報之盛節。歡呼聞禮。第誦思文之曩篇。

又

圓丘肇祀。率土均休。熙事遙成。湛恩隨霈。竊原經禮之載。莫重神明之交。三年親祠。盛王所以報本。列聖參侑。孝子所以奉先。於皇我朝。尤緝往典。恭惟皇帝陛下。聖躋維日。德肖于天。有懷前人。初見上帝。卜南至之長晷。罄中虛之一心。旣款殊庭。載假清廟。遂登蒼璧之幣。祇奠紫觚之營。百靈居歆。六樂備奏。乃薦鬯之夕。神光陸離。升禋于陽。霄寓澄廓。天旋法駕。星拱端闈。鼓舞兆民。普均雷雨之施。壽康丕后。並浹人祇之歡。臣適聽休成。倍深竊忭。忝司留鑰。異興歎于周南。阻從屬車。第馳誠于魏北。

代元厚之給事賀南郊表

躬行聖饗。遙觀熙事之成。嘉共神休。隨肆湛恩之霈。羣生鼓舞。諸福紛綸。洪惟盛朝。參用往典。報德產之

本所以三年一郊。盡孝心之思。所以四聖同侑。恭惟皇帝陛下。紹烈精之淳耀。承累洽之休期。聿懷前人。初見上帝。卜日南之長晷。祠地上之圓丘。百靈居歆。六樂備奏。乃薦鬯之夕。昭格神光之臨。升禋于陽。歛蒙天表之應。旋鳴清蹕。還御端闈。協氣交流。普均雷雨之施。懽心各得。並泆人祗之和。臣久去從聯。比塵使指。阻肅雍而相祀。第抃蹈以馳誠。

代沈兵部賀南郊表

竭精意于圓丘。熙成祀事。浹歡心于率土。霈發德音。凡在周行。維均竊忭。國家順稽古道。參用禮經。以天地大神。有廣生之惠。祖宗故事。存並侑之文。乘三年之親祠。追四聖之嚴配。恭惟皇帝陛下。濟躬乾健。至德離明。自臨皇路之尊。肇奉紫觚之饗。謁泰壇而徧乎道祖。假清廟以極乎孝思。力畢獻于九州。助各來于四海。陶匏有踐。幣玉普登。神明相交。禮樂並作。高禋上達。通肸蠁于靈心。協氣旁流。格紛綸之瑞應。於昭景貺。以右不圖。乃御端闈之崇。遙孚渙號。嘉與罄宇之內。共沐龐休。臣跡繫朔陲。心馳魏闕。陪祠莫及。拜慶徒深。

賀正表

伏以東國著經。謹春秋之五始。西京講物。覽圖籍于三朝。於皇盛時。尤重令節。恭惟皇帝陛下。欽脩人紀。茂憲天心。七政之察璿璣。四氣之和玉燭。方對時而育物。屬獻歲之發春。星拱臣鄰。稱慶歲元之會。日章聖德。同符歷紀之新。臣適守別都。正遙丹旆。阻預壽杯之獻。不勝魏闕之情。



賀冬表

伏以雲物望書。因豫知于祥祲。天陽來復。方漸發于孳萌。恭惟皇帝陛下。握斗披先。對時凝命。遙臨慶序。翕受鴻禧。鳴玉造廷。儀亞三朝之盛。測圭視日。景同萬壽之長。臣適領守符。方遙陞城阻。預捧觴之列。第虔拱極之誠。

賀皇帝登位表

伏以虔遵末命。光紹丕基。天地同符。人祇共悅。臣聞重華之協于帝。所以陟元后之尊。下武之繼于文。所以昭先人之業。恭惟皇帝陛下。聖躋維日。德肖乎天。性于欽文。躬有歷數。四方所照。適仰燭于離明。萬國以寧。遽獨觀于乾造。荷五聖之謨烈。副三靈之眷懷。臣早預禁聯。久違朝宇。恭聽龍飛之會。阻陪鼇抃之行。

又

大明相繼。景命維新。凡在懷生。孰不稱慶。臣聞帝出于震。品物所以咸蘇。龍飛在天。聖人所以有作。恭惟皇帝陛下。至仁生稟。盛德日躋。孝悌溫恭。發于主器之際。聰明睿哲。廣自承祧之初。人祇交權。宗社永賴。雲行雨施。矧霽霈于德音。乾端坤倪。率薰蒸于喜氣。臣適提外計。久去邇聯。第深欣戴之誠。阻預僉呼之列。

賀太皇太后受册表

載享尊名。益光令典。欽聞大慶。胥悅羣情。恭惟太皇太后殿下。至德靜專。柔儀閑淑。粵嬪仁廟。以位中宮。訖無私謁之心。陰有相成之道。全節鉅美。揜前世之徽音。順子慈孫。續兩朝之孝養。惟是神功之超卓。難哉顯冊之形容。臣逃聽禮成。不知手抃。方居留于北道。阻馳慶于明廷。

賀皇帝爲太皇太后皇太后受冊表

輔臣虔使。奉寶刻于二宮。聖主尊親。廣孝心于四海。恭惟皇帝陛下。寶有重器。勤懷永圖。妙斷日新。睿能天縱。維神幾聖。烈蓋自得于生知。而子道孫謀。乃一歸于慈訓。爰舉極尊之號。以酬莫大之恩。臣適守宮符。遽聞國慶。阻就歡呼之列。第深鼓舞之情。

又

思齊太任。方受尊名之禮。稽古帝舜。益光絕德之風。凡在照臨。率均忭蹈。恭惟皇帝陛下。聖躋維日。德肖于天。念撫毓于清躬。荷愛慈于文母。極九州之味。以爲養。未充孝心。上萬年之壽。以爲歡。自篤恩性。遣輔臣而申飭。奉顯冊以上聞。寶刻燦然。光有司之備物。宸衷祇若。答莫厚之深仁。臣久去近班。側聞盛典。阻歡呼于嵩極。猶繫滯于周南。

又

上崇名于長樂。仰慰慈顏。舉盛典于熙朝。益光孝治。照臨所及。懽蹈其均。恭惟皇帝陛下。獨運乾綱。若稽古道。自臨正宁之凝命。克謹內朝之問安。荷文母之仁深。撫清躬而愛篤。夙厚恩性。比同政幾。復辟踰年。

遂高懷而退處。有司擇日奉顯冊以上聞。臣久去從聯。方恪司于留鑰。阻陪慶列。第延望于明廷。

又

尊名恭上。慰長樂之慈顏。盛禮敷聞。廣中宸之孝治。照臨齒及。鼓舞維均。恭惟皇帝陛下。駿命紹休。清衷覃粹。懋聖人之至德。仰事內朝。大文母之徽音。寅加顯冊。飭輔臣而虔使。奉寶字以尊親。能報厚恩。豈止三牲之養。載光大號。可形四海之風。臣適處外臺。正遙丹朶。激懼誠而尤劇。就慶列以無從。

賀皇太后受冊表

寶文溫厚。奉國典之休稱。聖孝尊親。極母儀之大奉。遙光盛禮。增抃周行。恭惟皇太后殿下。夙懋柔儀。誕敷陰教。含坤元之德。久內助于先皇。育天下之君。旋尊居于長樂。比厭政幾之聽。屢形慈訓之勤。復辟踰年。尚淹于顯冊。有司擇日。爰上于隆名。臣適領漕符。欽聞國慶。阻就歡呼之列。第深鼓舞之情。

又

恩篤內朝。禮崇顯冊。四海臣妾。一辭歡呼。恭惟皇太后殿下。坤德靜柔。母儀光大。進賢以輔先帝。有內助之勤。斷愛以戒後君。無外施之失。動懷明識。嗣鬯徽音。含飴弄孫。早優游於長樂。臨軒遣使。方享受于隆名。臣比領左符。側聞盛典。阻從慶列。第激懼誠。

又

寶字肅將。飭輔臣而虔使。隆名恭上。極聖帝之尊親。慶浹天區。事光坤極。恭惟皇太后殿下。懋靜專之懿。

德推涵育之慈懷。順承上天。輔佐先帝。有相成之道。無私謁之心。逮聖嗣之繼臨。預政幾之同聽。大公天下。未嘗恩澤于外家。密導宸衷。多用祖宗之故事。旋還明辟。益廣徽音。長樂優游。自享九州之養。內朝定省。乃惟四海之君。欲報厚恩。遙崇顯冊。嚴母儀之大奉。盡臣屬以均僭。臣久去陞廉。比司宮鑰。側聞盛典。竊忭愚襟。

又

欽奉內朝。上進極尊之號。懽呼馨宇。下均欲報之心。恭惟皇太后殿下。坤德靜專。母儀光大。進賢以輔先帝。有內助之勤。斷愛以勗嗣君。無外施之失。自懇還于明辟。益增廣于徽音。含飴弄孫。遂優游于長樂。臨軒遣使。旋享受于隆名。臣適領漕符。方遙廷著。莫陪慶列。第激懽誠。

賀皇帝爲中宮受冊表

琬琰敷言。遙恭行于盛典。宮闈動色。益增耀于徽名。凡在有生。維均大慶。恭惟皇帝陛下。寶有重器。勤懷永圖。踐宸極以稱尊。重坤儀之作配。念邦家之所御。先在儀刑。猶日月之相須。始全臨照。緊進賢而輔佐。廣稽古之聰明。以正位于長秋。未膺顯冊。因熙成于大禮。爰舉上儀。臣職繫朔陲。身遙丹旆。徒仰母臨之慶。莫從鼇抃之聯。

又

有司備物。謹擇日以選儀。乃聖臨軒。重覩天之作配。文敷琬琰。喜動宮闈。恭惟皇帝陛下。稽古稱尊。撫辰

凝命。丕有至明之極。亦資內助之賢。厚德承乾。貴天王之同體。長秋正位。懋太妣之徽音。爰加冊禮之崇。以稱坤儀之大。輔臣將命。持使節以奉行。率土傾心。仰母臨而懽忭。臣任靡朔野。跡遠明廷。就慶列以無階。馳愚衷而第切。

又

儷宸極之尊嚴。屢周華歲。膺寶文之溫厚。增耀長秋。凡在懷生。率同大慶。臣聞闕雝所以基王化。坤順所以承乾元。岐陽之宜百男。驗進賢之效。媿納之嬪二女。輔稽古之明。以迄盛朝。亦資內助。恭惟皇帝陛下。清衷昭曠。至治登闕。大亘地以稱尊。重倪天之作配。以禕衣之奉宗廟。裸獻時勤。而赤綬之正宮闈。柔恭日茂。尙淹盛典。未稱徽名。申飭柄臣。肅將冊禮。臨軒以遣使節。示極褒宗。率土之仰母臨。維均抃蹈。臣比司宮鑰。阻侍殿帷。第激懽誠。莫從慶列。

又

禮行吉日。冊備長秋。喜動六宮。慶均萬寓。恭惟皇帝陛下。紹休五聖。齊德二儀。丕有至明。亦資內助。乃眷中闈之重。尙稽顯冊之加。爰命弼臣。奉將盛典。維邦家之所御。先在儀型。猶日月之相須。始全臨照。臣比司留鑰。正遠朝鑾。莫從鼇抃之聯。徒仰母臨之慶。

代韓魏公賀淮陽郡王進封穎王表

伏覩邸報。皇子淮陽郡王進封穎王者。真封易地。徽冊告庭。遙增王爵之光。載發宸闈之慶。薦紳聳聽。罄

宇均懽。恭惟皇帝陛下。一德溥臨。萬幾獨運。性堯仁而睦族。躬禹度以儉家。乃眷天支。曰咨國典。以主器莫尊乎長子。而擇日以命夫有司。寵換舊藩。進疏新渥。孝恭天至。克謹問安之朝。文敏日躋。靡煩在傅之日。側聞盛禮。大愜羣情。臣跡限居留。心馳慶列。無任瞻天樂聖。聳躍懽呼之至。

賀穎王納妃表

宜家淑德。作配元良。極典冊之盛儀。誠邦家之大慶。臣聞人倫茲始。嘉禮所以重乎婚。宗事其承。親迎所以聞于誠。恭惟皇帝陛下。建大清之極治。紹淳耀之烈光。畢張朝經。爰及家事。乃眷天支之愛。矧居王爵之尊。孝友生知。溫文日就。雖曰少成之善。當資內助之賢。歷選華門。進嬪朱邸。適得公台之後。備該圖史之聞。禮法自嫻。言容兼懋。長子主器。既度越于戚藩。遣使臨軒。亦寵優于嘉耦。將傳萬世之嗣。茂對三星之期。動喜氣于深宮。沸歡聲于罄宇。臣適司留鑰。阻預朝鑾。鳳飛遙聽于吉占。鼇抃第馳于愚悃。



# 祠部集卷十五

表

代韓魏公謝歷日表

清臺密課。綠檢細書。旣叨拜祝之榮。又被勸民之訓。竊以布治正月。雖萬俗之具觀。頒朔諸侯。欲四方之皆曉。恭惟皇帝陛下。乾綱總攬。王事遙新。戶牖儲精。自坐知于天道。璣衡則象。復敬授于人時。臣適忝居留。預聞辰告。當仰虔于詔意。使畢懋于歲功。

又

西京講物。萃圖籍于三朝。東國尊王。書春秋之五始。恭惟皇帝陛下。至仁天冒。盛德日躋。晏然享函夏之歸。坐以須大明之旦。蒸民觀象。會歲歷之更端。上帝降康。宜春祺之備合。臣懷章北道。方諧偃息之求。稱壽南山。阻預歡呼之列。

又

日月所躔。天地之紀。會成密課。例被誕班。恭惟皇帝陛下。握斗宅尊。撫辰凝命。靈承乾緯。首飭人時。黼坐儲精。長茂在躬之數。清臺考法。順稽合體之元。臣適守留符。預觀明訓。豈敢失墜。惟謹奉行。

代韓魏公謝進仁宗實錄賜詔獎諭表



大典告成。實虞漏略。細書垂諭。猥被褒嘉。伏讀載周。兢榮失措。恭以仁宗皇帝。稽古文思。憲天聰明。高拱博臨。享國既久。至仁廣澤。入人者深。威惠之漸外區。命令之孚羣聽。忠賢哲輔之參用。墜禮闕儀之並脩。可著無窮。悉歸所載。編研之手。固曰難才。典領之司。尤非易處。而臣叨榮有日。逮事當時。久居機政之間。親奉德音之數。雖見聞之靡惑。終才識之非長。妄董諸儒。獲成信史。比塵聖覽。方慙愚衷。伏遇皇帝陛下。祇服孫謀。遙追祖烈。以天地之德難紀。赦其撫實之非工。以歲月之積頗多。因以念勞而加獎。欽承寵賜。惟謹榮藏。

代韓魏公北京謝上表

獨當一道。尙容惰竭于微才。兼撫連城。實恐難勝于重任。肇班寬詔。深愧厚恩。伏念臣風力不強。器能實薄。致身奚識于枉道。接物惟存于至誠。朝廷非繫于重輕。將相輒更于出入。且所臨皆劇。精神已耗于當年。而其得過多。疾病遂成于今日。方戢倦飛之翼。少安舊集之林。甫爾涉春。遽然易地。大稱全魏之部。北控幽燕之疆。比雖水旱之稍平。茲尙民流之未復。冀蘇疲俗。爰屬老臣。顧無惠術以安人。慮乏威聲之服遠。始懇辭而弗獲。訖冒號以爲慚。此蓋伏遇皇帝陛下。政在圖新。任先求舊。特自清衷之所簡。不惟綿力之弗堪。敢不蒐講武經。導宣利澤。殘軀黽勉。倘偶立于事功。睿旨丁寧。庶弗孤于器使。

代韓魏公謝賜詔允相州表

引疾拜章。不覺懇言之累發。賜書遣使。忽蒙聖諭之矜從。恩重何勝。感深以泣。伏念臣久塵大任。一信孤

忠禦邊未究于薄能。臥閣旋嬰于宿疹。徒然自勉。曾未有瘳。勢不遑安。顧總帥非養疴之地。情無所隱。冀上心推從欲之私。果軫淵衷。特頒溫詔。備詒禮遇之非薄。更赦赤愚之可誅。俾息殘軀。許還舊守。書奏而臨淵。每懼恩俞而弗藥。自康豈曰衰罷。可當眷寵。此蓋伏遇皇帝陛下。仁如天冒。德與日躋。虛懷最後四隣。愛不移于內外。拂性恐傷一物。念愈篤于始終。容解劇煩。庶期完復。優游此日。倘存犬馬之餘生。詎勉異時。誓答乾坤之大施。

代韓魏公謝遣使齋詔撫問及授大名府判兼河北安撫使表

使指親臨。詔音開論。清漳病骨。蒙曲軫于餘生。全魏高牙。俾勉從于重任。成命固知于難免。私心間有于未安。伏念臣幸適逢時。才非經世。早以功名而自許。不知量力而後行。晚雖衰茶之相乘。未卽乞身于勇退。丐故鄉而偃息。冀滿歲以優游。會朔野之滄災。動上方之北顧。乃分綏御之柄。以屬短疎之材。而又丁寧以遵卹民之言。周旋以盡使臣之禮。此蓋伏遇皇帝陛下。寬仁兼愛。終始誤知。因付畀于劇權。首簡圖于舊物。倘止以別都而假守。猶堪強策于疲鷲。如兼數路之提封。實恐坐成于瘵曠。所有兼河北安撫使臣已別具劄子論奏。謹奉表稱謝以聞。

代韓魏公謝再任表

悃悞累陳。從欲許還于新節。衰疲自力。竭能勉撫于舊封。委寄逾陳。顛濟是懼。伏念臣本緣一介之曲學。歷被三朝之誤知。自解宰鈞。繼紆守紱。早年遇事。風霜不計于殘軀。晚歲纏疴。藥餌乃同于常膳。比引揣

躬之分。數裁辭劇之章。力丐閒州。少安病質。而恩生望外。事與願違。俄更西雍之帥旄。仍赴北門之留鑰。所以極陳去就。仰瀆聰明。幸寵利非事君之宜。必冀寢加恩之命。策疲驚雖老臣可強。敢不拜再任之休。訖奉俞音。兩諧愚懇。此蓋伏遇皇帝陛下。至仁天冒。盛德海涵。器使庶工。愛偏舊物。雖俊傑甚衆。並試有爲之時。而疇瘁之餘。惜投無用之地。敢不勤宣條教。兼拊兵民。倘溝壑之未填。尙乾坤之可報。

代韓魏公謝加功臣食邑實封表

三年親郊。一日慶澤。乃眷近司之舊。遙加美號之榮。賦兼益于爰田。懼實深于維谷。懇辭弗獲。虛受爲慚。伏念臣力學不強。賦能俱短。二府迭居于一紀。三朝奚補于萬分。要路妨賢。故鄉乞守。自季秋之去國。僅三月之偃藩。伏值朝家。若考前經。肇禮上帝。九州畢獻其力。四海各勤其來。而臣適領左符。第聞盛禮。固不能聽屬車之雷動。扈從諸塗。觀吉土之天臨。肅雍在位。逮成熙事。首沐湛恩。併推異數之優。增負罔功之愧。此蓋伏遇皇帝陛下。祇節聖饗。永承天心。雖於穆猗那。已形容于美頌。而克自抑畏。弗專享于蕃禱。均霈洪私。俯延外牧。敢不勤宣條教。益勵忠規。免貽空食之羞。兼塞假名之議。

又

熙事遙成。湛恩隨布。載加寵號。兼衍真封。賦仍進于爰田。懼實深于維谷。伏念臣素慚遠業。自信孤忠。朝廷非繫于重輕。將相輒更于出入。平生許國。竭愚慮而不無。連歲撫民。論治功而何有。伏值寧朝。展采陽館。奉禋四海。各來莫克。陪祠于夙夜。九州畢獻。尙安助費于毫釐。建推神貺之均。首及宰司之舊。蕃然異

數。萃此罔功。飭詞臣而賜書。遣族孫而將命。禮躡常矩。恩激微衷。此蓋伏遇皇帝陛下。靈承天儀。風示民孝。雖鴻名弗受。自存聖德之全。而不祖所蒙。嘉與臣鄰之共。敢不勤宣睿訓。勉懋壯猷。庶逃空食之羞。兼塞假名之議。

代韓魏公謝中使齋詔令赴闕朝見表

故鄉得請。合從便道之行。溫詔垂音。特許明庭之觀。仍飭王人而將命。愈知君父之隆恩。俯伏拜嘉。兢榮萃感。伏念臣自明愚分。獨特主知。懷章本望于息肩。改帥弗容于量力。私心尙歎。未遑觀成卒之旋歸。宿疹俄嬰。安敢效古人之臥治。雖獲鄉邦之願。豈忘魏闕之思。召節遙臨。禮數尤異。此蓋伏遇皇帝陛下。不遺舊物。垂記孤臣。親遣星軺。俾傳天旨。仰荷乾坤之愛。曷勝犬馬之情。

代韓魏公謝都知傳宣撫問並賜龍茶表

北門居守。未宜驚力之寸勞。南土貢珍。遽錫龍盤之上品。仍屈王人之長。親傳天語之慈。恩重難勝。感深以惕。伏念臣初無遠業。訖至近司。間緣疹疾之乘。方避寵榮之極。勉來全魏。且兼拊于兵民。幸邇故鄉。猶少安于習俗。一切師領。屢拜君言。存問旣勤。匪頒尤渥。矧靈芽之異產。豈俗肺之易嘗。此蓋伏遇皇帝陛下。克念老臣。弗遺舊物。垂睿音而下及。加寵賚以俱霑。載省衰疲。奚從報塞。

代韓魏公謝詔書撫問表

念臣衰之多病。適履歎炎。煩主聖之推慈。有加軫卹。詔音開諭。使指親臨。伏念臣蚤備近司。初無遠業。猶

竊將相之過寵。盡出聖神之誤知。忠與生俱。馨厥股肱之效。疾隨老至。僅乎皮骨之存。溽暑貫時。淵衷閱舊。因曲頒于睿旨。俾自補于殘軀。此蓋伏遇皇帝陛下。盛德海涵。至仁天覆。治恐傷于一物。欲盡安全。愛尤篤于四隣。弗殊內外。特垂清問。爰及孤臣。

代韓魏公謝傳宣撫問表

恭被德音。遠聞睿訓。以帥權尤劇。防閑俾慎于忽微。而聖慮過深。愛惜實同于顧復。伏念臣本無遠業。止任孤忠。相二宗之日。雖多事陛下之時。猶淺。第云智力之逾竭。未有謀猷之可嘉。尚賴風雲協期。日月垂照。灼知戇樸。可備使令。斷自上心。付之西略。迄去離于左右。蒙記憶于姓名。恐識不明。未朕之前。而事或暗可虞之際。導至言之委曲。遣中使以丁寧。難勝之恩。有如九鼎之重。欲報之命。不啻一毛之輕。昔告齊宣。嘗聞孟子。謂君之視臣如手足。則臣視君如腹心。今陛下念區區之蹤。其撫存既若此之厚。在臣某荷巍巍之德。其愛戴宜如何之深。誓委微躬。仰酬洪造。

代韓魏公謝傳宣撫問并賜湯藥表

星軺將命。忽傳金玉之音。天旨均慈。仍拜刀圭之賜。兢榮維谷。荷戴如山。伏念臣久玷冢司。備蒙睿獎。知樸忠之可使。付寵寄而不疑。一遠威顏。再經旬浹。悉心圖報。弗知道路之勤。回首瞻恩。惟有闕廷之戀。方休徒御。初見吏民。遽被溫言。兼班珍劑。此蓋伏遇皇帝陛下。俯憐舊物。有軫深仁。念病質之久衰。冒時寒而遐適。特賚養疴之具。仰銜惻隱之恩。誓竭愚能。少酬聖眷。

又

議將易地。先開諭于溫書。念此養痾。復分頒于靈藥。禮誠出于特異。力敢忘于自量。伏念臣幸適逢辰。才非經世。少則被用。不謂精神之有涯。老猶謹身。至于衰茶而後已。向往經于疆場。比入覲于闕廷。天光照見于殘骸。鄉曲許還于素志。優游偃息。纔安僻郡之十旬。委曲丁寧。欲付朔陲之數路。屬此大寒之際。軫其多病之餘。親飭輕輅。兼頒珍劑。此蓋伏遇皇帝陛下。視孤臣之厚。無舊物之遺。拜嘉雖荷于深恩。揣己難勝于大任。臣已別具劄子奏論。謹奉表稱謝。以聞。

代魏韓公謝詔書賜湯藥撫問表

舊痾荏苒。乃貽君父之深憂。溫詔丁寧。更屬王人之曲諭。言頒靈劑。俾輔殘軀。伏念臣學昧聖賢。名兼將相。祿旣浮而量溢。福不勝以災生。忠激一心。雖曰股肱之自力。疾攻四體。僅乎皮骨之獨存。敢圖皇慈。特遣使指。形十行細札之訓。分五色一丸之輝。豈云衰遲。可稱矜卹。此蓋伏遇皇帝陛下。愛偏舊物。義篤老臣。爲憐犬馬之嘗勞。不輕螻蟻之至細。始終乃眷。遠近弗移。倘積疹有瘳。喜敢言于勿藥。顧大恩欲報。命何啻于如毛。

又

詔旨趣行。方就所封之國。聖心垂軫。俯憐多病之軀。爰飭貴璫。特頒珍劑。捧受惟知于恩重。報償逾覺于命輕。伏念臣自效孤忠。累更大任。俱殫智力。勇爲不復于當年。兼拊兵民。劇用尙蒙于今日。靡容辭病。豈

敢圖安。勉去故鄉。亟來會府。卹民寬詔。奉行未及于彌旬。將命輕輶。傳聞已臨于所部。賜細書之溫厚。加靈藥之光輝。此蓋伏遇皇帝陛下。愛篤老臣。念深舊物。以驅馳之卽舍。俾服餌以扶衰。仰戴睿慈。曷勝愚抱。

代韓魏公謝賜藥物表

老臣告疾。累奏于囊封。聖主推仁。特頒于藥物。恩踰望表。感極情涯。伏念臣幸適逢時。才非經世。昔懇辭於冢任。旋總制于西師。夙夜忘疲。庶寸勞之報國。寒暄乖攝。俄舊疾之嬰身。瀝愚悃于上聞。動睿慈之垂卹。命使者之駕傳。宣惻隱之言。按神農之經。仍賚蠲疴之品。自慙弱質。有軫清衷。此蓋伏遇皇帝陛下。禮厚近司。愛偏舊物。欲勉驅于衰茶。因曲賜于矜憐。良劑載和。庶仰資于衛養。洪私所被。敢少怠于報償。

代韓魏公謝賜生日禮物表

報極終身。感遂親生之日。禮頒多物。恩深君賜之時。伏念臣蚤竭孤忠。久更大任。效微毫髮之可數。力覺筋骸之已疲。竊愧妨賢。屢求去位。萬錢空食。進無補于聖明。六纛啓行。出猶叨于將相。兆涼厥月。載育初辰。垂記淵衷。猥加異數。衣均內帛。駟出天閑。飾有繡麟。玩兼鏤器。遣子舍以將命。耀公庭而拜嘉。生也降神。維翰實慙于山甫。力非稽古。所蒙何望于桓榮。此蓋伏遇皇帝陛下。德厚生成。愛伴顧復。俾孤臣之誕日。榮寵錫于聖時。敢不恪勉事功。益循涯分。既謹且乘之戒。仍逃不稱之譏。誓罄丹衷。仰酬洪造。

親生任旦方追顧復之恩君賜維時遽被寵榮之數拜嘉既渥萃感兼深伏念臣自任孤忠遂階顯服萬  
錢之享十年已負于空餐六印之歸一道尙尸于重寄適臨誕日垂記淵衷賜出帝庭命銜子舍織文鏤  
器以光其玩綉鞵良駟以養其安葆室增輝羸軀動色維周之翰固慙山甫之生稽古所蒙何有桓榮之  
力此蓋伏遇皇帝陛下至仁天冒大度海涵曾舊物之弗遺省初辰于載育適頒多物併及孤臣敢不脩  
建事功益循涯分既謹且乘之戒仍逃不稱之譏庶答洪私曷勝丹抱

又

親生在旦方萃感于已孤君賜維時遽拜嘉而至渥寵榮所集震厲無從伏念臣底滯天資迂疏時用特  
緣一介之術業游歷三朝之弼謨罄竭短才猶坐兼于袞鉞徘徊重祿未歸就于田廬左弧第謹于私庭  
中詔忽傳于子舍衣頒內府馬錫天閑鞵葉有輝器文加鏤生而維翰實慚山甫之降神今也所蒙又異  
桓榮之稽古此蓋伏遇皇帝陛下愛深舊物禮厚孤臣垂記始生猥加異數敢不益殫驚怯少答龍光庶  
逃不稱之譏仍謹且乘之戒上恩既重臣命逾輕

又

門弧之志四方適記親生之始邦詔之書一札遽蒙君賜之臨矧惟被惠之優榮敢不拜嘉而竦激伏念  
臣比塵冢任自信樸忠才近不足以鬯遠猷智小不足以諳大體未竭股肱之效已嗟筋力之疲妨賢懇  
避于宰塗本覬鄉邦之養疾易守忽兼于帥路復叨關輔之宣風西略是經寸勞何有適丁誕日第謹私



門敢謂睿明。亦煩省錄。飭身枝而將命。獲手舞以敷休。良駟繡鞵。既輟天閑之數。織文鏤器。復分御府之餘。光生陋軀。榮動衆目。考愚衷而自省。知恩紀之由來。此蓋伏遇皇帝陛下。禹度并容。堯仁廣被。乃眷四鄰之舊。不遺千里之遙。爰舉舊章。併推蕃錫。孰爲進退。一酬今日之所蒙。必也功名。庶保爾生之無忝。

代韓魏公謝生餼表

抱恨已孤。記親生之有日。載廣既渥。感君賜之維時。拜命云初。銜恩莫罄。需雲寵被。震厲交深。伏念臣風力不強。時才甚陋。萬鍾厚祿。十年已負于空餐。六印重權。半歲頗慙于假器。身遂戎旃之遠。心存王室之間。厥生之初。在秋云孟。遽荷懽恩之浹。仍蒙飫賜之臨。此蓋伏遇皇帝陛下。優渥老臣。始終舊物。記其誕日。嘉乃丁時。均麴粢之精甘。輟醪牽之肥旨。既醉既飽。愈防鼎食之浮。有猷有爲。畢望豐功之立。庶殫塵露。少答雲天。

代韓魏公謝賜生日禮物表

左弧之志四方。日記親生之所始。細書之行一札。時蒙君賜之云臨。期服寵榮。彌深震疊。伏念臣素無遠業。特恃孤忠。夤緣誤恩。塵玷重任。出入將相。萬錢久負于空餐。綬御兵民。六印洊叨于兼綰。適逢載毓之旦。方軫已孤之懷。奉將溫辭。垂遺愚息。衣出內府。馬分上閑。帶飾光軀。器文溢目。降神之美。維翰旣慚。山甫之生。稽古之誇。所蒙又非桓榮之力。此蓋伏遇皇帝陛下。不遺舊物。曲示厚恩。名器所司。輒容于假寵。服乘以拜。唯有于論酬。誓訖餘生。少償洪造。

代韓魏公納節表

躬荷兵民之重任。既非有疾之能勝。生蒙將相之兼榮。抑豈無功之可據。比懇還于印飾。庶僻守于麾符。蓋高未動于物情。宜諭遽煩于使指。游敷危懼。決俟兪音。伏念臣四紀逢亨。三朝竊寵。良自寡能而厚祿。遂罹多病以久衰。一辭東府之鈞衡。再領北門之筭鑰。莫非強勉。以濟劇繁。心雖云勞。力有不逮。以至河  
鰲舊防而失備。民逃常產而未歸。職由冒居。皆合引去。然猶徘徊歲月。偃息朝昏。庶幾小康。翻覺筋骸之  
漸憊。若曰微效。訖無毫髮之足甄。于茲不能。可以遂止。苟尚貪于要地。將不保于餘生。惟有至仁。能全微  
欲。伏望皇帝陛下。俯憐舊物。特軫孤臣。許上戎旃。并收貂冕。小邦簡靜。俾專近于方書。悴質支離。免卽填  
于溝壑。瀝膽願回于天聽。沒身期執于君恩。

第二表

由衷叩露。納節矧緣于疾辭。冀上哀憐。改麾兼賜于可報。物情必至。天意未回。苟避雷霆之誅。恐先溝壑  
之委。敢殫危懇。決俟兪音。伏念臣生賦樸忠。早塵顯服。不惟智力之可否。但務私恩之報償。甫及中年。遂  
罹多病。自叨再任之後。已是久衰之餘。雖復親近簿書。繕完城府。蓋一日效昔人之必葺。固匪樂爲。且三  
載乏往典之陟明。自宜引去。况兵民非臥疴而可治。將相豈尸祿而得居。更勉強以貪榮。將顛隳而速禍。  
弗全殘喘。有累至仁。伏望皇帝陛下。日月照臨。乾坤覆載。任別圖于衆哲。志曲就于匹夫。許上戎旃。免司  
留鑰。息肩閒郡。俾生意之稍完。沒齒盛朝。庶皇慈之可答。

第三表

罔功納節。以疾請麾。再嘗自陳。一切未許。行恐餘生之不保。敢千萬死以有聞。伏念臣中實枵然。生而翫甚。寵榮欲報。勇于遇事。而輒爲筋力。旣衰。失在知難而未止。比救將顛之質。疊傾必至之誠。厚祿戒貪。願上淮南之旄鉞。小藩乞守。免當河朔之喉襟。尙遲矜從。尤激危懼。蓋殘軀不息。慚歸溝壑。之爲隣。空食寢深。轉愧涓埃之無補。伏望皇帝陛下。特回天聽。俯徇物宜。不遺螻蟻之微情。各任鷦鷯之常分。有民人足以爲政。畀支郡足以養疴。許將相之辭隆。絕公朝之假寵。旣完素守。仍息久勞。恩施難名。報償何有。

第四表

病難任劇。職合辭隆。開可不時。顛躓無日。危迫敢殫于血懇。哀憐願軫于皇情。伏念臣起自孤生。初無遠業。祿常過量。寵榮最早于他人。福不勝災。疾疹遂纏于今日。所以懇還將相之印。力避兵民之權。庶就閒州。少舒瘁質。私計已決。愚誠不移。雖委寄誤深。不謂三年之已久。而衰疲待報。翻嗟一日之爲長。矧是戎旂。固非虛器。無功以領于義。未安使老臣兩失于寸心。豈人主相優之本意。伏願皇帝陛下。特回天鑒。曲盡物宜。就更麾符。許上旄節。驅馳驚足。免令濱死以未休。偃息殘骸。或冀餘生之可保。大恩難狀。丹抱奚論。

第五表

重負未釋。日寢久而力窮。疾呼欲聞。天轉高而聽緩。敢罄論于懇迫。願畢賜于矜從。伏念臣自信直誠。所

羞枉道寵利雖豐而宜取未始輒辭事爲至劇而可當曾何少避惟是戎旂兼一品之要留鑰守三年之餘得既過多號亦云久且無功而享厚祿雖貪夫有所不爲多病而荷重權在老者尤難自強所以納節以逃空食之恥乞守以息殘軀之勞凡經危悃之屢陳未施德音之一可苟遂循于緘默是坐待于顛隳伏望皇帝陛下曲貸餘生洞明孤抱知辭隆非出于飾僞念避劇實緣于負疴就改麾符并收旄鉞親近醫藥免令溝壑之卽填養安形骸悉自乾坤之再造謀心已決得請後休



# 祠部集卷十六

表

代曾魯公辭加恩奏

合宮已事。罄宇均禱。首眷近司。併推蕃數。罔功被獎。匪服懷慙。在義未安。獲辭乃止。伏念臣蚤緣家學。繼竊朝榮。策足冗塗。致身華貫。始校文于書殿。尋勸講于經帷。進司西掖之言。起視北門之草。以至攝治大衆。參聞萬幾。往冠斗宮。曷坐籌于勝算。旋登台路。第隨講于成規。迄是踰年。居然備位。伏遇國家風示民孝。靈承天儀。尊推先君。昭配上帝。并升圭幣之潔。益凜廟祧之嚴。裸將于宮。樂徹乃俎。熙成禋禮。霈發德音。慶浹人祇。寵先承弼。既疏美號。并衍真封。而況克濟上儀。實非一力。有主計之臣。以助乎經費。有陪祠之衆。以供乎駿奔。禮率按于舊常。事動咨于睿訓。夫惟彼相。于此何功。翻兼冒于王明。懼弗容于物議。尙緊確讓。可弭煩言。伏望皇帝陛下。全度天涵。大明日照。洞微衷之必至。追成命于已行。特寢誤恩。俾諧愚分。

第二表

贊書錫寵。錄相祀之微勤。讓牘啓還。具假名之大略。靡回宸旨。促拜恩章。雖前蹈于嚴誅。難少移于確請。游披危悃。決俟俞音。竊以輔相乃表儀之司。匪義則動將安仰。慶賞無巨細之異。當分則處之弗疑。而況

捍難者是謂功臣。固非虛號。進律者抑存玉制。莫重真封。豈有陪原廟之天臨。扈屬車之雷動。陟降九筵之次。雍容萬玉之先。密奉清光。縱觀盛禮。顧粲盛之豐薦。益抃時和。省俎豆之前聞。頓還舊學。茲爲厚幸。復敢叨恩。矧聖饗之先期。有王言之誕告。具咨列辟。毋上鴻名。而臣地在具瞻。誼當一德。侍嚴祠而何力。尙爾尸榮。思明詔以何顏。甚于得責。伏望皇帝陛下。如天從欲。與物終仁。念志莫奪者匹夫。且賞不妄者人主。亟追繆寵。以勸有功。

代曾魯公謝加恩轉官表

官榮不次。列讓牘以啓還。宸旨莫回。降批章而促拜。寵靈滋極。涯分深躡。承命若驚。撫躬莫措。伏念臣日蒙樂育。天與樸忠。才不足以濟時。誼惟知于許國。因緣資序。凌歷禁嚴。孤立公朝。固絕心于朋勢。久登宰路。常持慮于滿盈。建功無塵露之微。負責有邱山之重。遭昌期之相繼。膺景命以維新。需發德音。並均澤浸。特舉便蕃之數。示優燮理之司。遽進崇階。仍躋榮于鳳閣。驟加庸品。將取刺于鵠梁。竊揆謨恩。愈知厚幸。此蓋伏遇皇帝陛下。至仁丕冒。大度兼容。曲眷柄臣。務全邦體。苟筋骸之可強。誓効微勤。在肌髓以寧忘。仰酬洪造。

代曾魯公謝男授龍圖閣直學士表

愚息進秩。就加舊閣之從聯。老臣退居。愈幸私門之榮觀。仰承乾造。俯劇震驚。伏念臣歷事三朝。蚤更二府。遽至禮經之七十。未償恩紀之萬分。印綬寵名。悉上王朝之久。圖書寶構。誤延子舍之微。何意頽齡。與

逢顯渥。此蓋伏遇皇帝陛下。至仁天覆。盛德海涵。博延衆材。畢取介善。不遺輔國之舊。遂及趨庭之私。敢不教忠。俾盡馳駑之薄效。庶其論報。弗辜舐犢之微情。

代曾魯公謝生日禮物表

門弧設左。視生適記于初辰。邦詔發中。君賜遽頒于多物。拜嘉有腆。萃感無涯。伏念臣南服孤生。端朝平進。偶緣樸學。寢歷華塗。器不兩周。安適方圓之用。才無一可。矧兼文武之資。自樞幄之冠謀。卽宰庭而亞政。未竭股肱之效。已驚齒髮之衰。竄畏人言。曷裨王體。惟載生之始旦。第自謹于私門。敢謂睿明。亦煩省記。敕身枝而將命。俾手舞以敷休。鏤器織文。殫巧工之精製。華纈良駟。分寶技之餘輝。榮動比閭。光生豐蔀。仰寵章之特異。知恩紀之由來。此蓋伏遇皇帝陛下。與物終仁。爲邦隆體。乃眷四鄰之輔。謂同一德之親。爰舉舊常。併推蕃數。皇慈甚渥。惠固絕于能名。愚抱如丹。誼惟知于欲報。

代王君貺尙書北京謝上表

環封千里。開府萬兵。坐制此方。據非其地。班條云始。負愧于中。載惟全魏之區。遐控強敵之境。洪河襟帶于其左。朔野咽喉之所衝。自罷郡以置都。常擇人而作屏。地望滋重。朝僉愈艱。曾紆兩府之印章。方付北門之管鑰。授之近侍。誠曰曲恩。伏念臣少也短能。初無遠業。先朝親試之次榜。甫冠首叨于甲科。臺省回翔。藩維偃息。犬馬之年尙壯。鷓鴣之序徧揚。蒼鬢嚴塗。覩顏空食。曷領中山之一道。兼提支郡之十城。尤幸菲才。適丁無事。日常安枕。歲聿更書。未瞻天日之清光。敢圖省錄。又乏涓塵之素效。何所甄升。就畀別



京弗沿曩制。仍加冢宰之秩。以示邦人之榮。此蓋伏遇皇帝陛下。神造曲成。乾綱獨運。懋法宮之新治。念仁廟之舊臣。特躡彝章。俾尸甸服。敢不刻求民瘼。蒐講武經。謹視河防之虞。豫嚴邊鄙之備。報償恩施。猶知今日之能爲。揭立功名。豈獨少年之所慕。

代王君貺尙書謝傳宣撫問表

貂璫中使。因將命于別京。管鑰守臣。辱記名于丹扈。俯宣溫諭。增感危悚。伏念臣僅有薄材。亶無奇節。樸忠自信。竊蹈古人之爲。孤直誰容。特膺先帝之遇。游揚中外。奚補毫分。自聖統之紹臨。卽帥符之遐部。靡須受代。旋易居留。固未能舞抃廣墀。一瞻天日之表。論思近著。少竭涓埃之愚。矧全魏之奧區。實朔方之會府。控制邊鎖。繕完河防。總一道之戎鈐。隸萬屯之兵籍。前有元台之舊老。已建成規。上繫真主之睿謨。第行寬詔。曾徵善狀。可格淵聰。祇自顧循。敢圖省錄。適遘星軺之降。遽聞天語之傳。出如絲綸。仰撫存之甚渥。煖于布帛。愈蒙被以爲榮。特越常獎。誠知厚幸。此蓋伏遇皇帝陛下。至仁丕冒。大度兼容。念法從之典藩。屢更全節。乘皇華之至部。親導玉音。下堂拜嘉。守土增耀。敢不深惟恩假。益勵忠勤。誓畢微生。覬酬洪造。

又

使臨所部。傳溫語之丁寧。跡遠于朝。荷清衷之省錄。才微自恨。恩重難勝。伏念臣受性至疏。逢時獨早。勵孤忠而自進。堅一節而靡踰。用不兼人。曷周臺省之務。拙于從政。漫歷藩維之行。自龍德之天飛。卽虎符

而州守決需滿歲。歸覲清光。就移全魏之封。漸近長安之日。神都南望。未一拜于帝暉。星傳北徂。遽再垂于天語。噢咻斯至。蒙被爲榮。念久冒于華塗。復累更于劇鎮。第勤夙夜。曾乏猷爲。止虞物論之非。罔裨毫髮。敢謂主知之誤。曲記姓名。每常遣于皇華。卽導宣于睿誨。此蓋伏遇皇帝陛下。至仁天覆。大度海涵。以法從之近聯。實先朝之舊物。念數經于事任。弗忍棄遺。思特示于恩勤。洵加存撫。誓圖薄效。仰答洪私。

代王尙書謝加食邑實封表

三年親郊。遙成熙事。一日慶澤。爰及從臣。疏新命于訓辭。增舊封之食賦。罔功被寵。匪報懷慙。伏念臣稟性樸忠。與世迂闊。歷華塗而始徧。愧薄效之未收。一離鳴玉之朝。數換剖符之地。宣上方之恩澤。亦旣累年。撫北道之兵民。汔茲半稔。伏念國家嚴順帝之大奉。講就陽之肇禋。四海各勤其來。九州畢獻其力。而臣適專留鑰之掌。絕望屬車之馳。奉引諸塗。空預甘泉之籍。駿奔以職。莫陪吉士之祠。第率守臣之常。坐脩方物之貢。甫訖聖饗。頻沾睿恩。旣廣爰田。復加眞戶。容孤臣之竊幸。由洪覆之推仁。此蓋伏遇皇帝陛下。靈承天心。均施神貺。雖清衷寅畏。自抑于鴻名。而慈渥涵濡。亦周于外輔。敢不勤宣條教。益勵忠規。免貽素食之差。思稱鴻恩之渥。

代王尙書謝添公使錢一千貫文表

公須匱乏。輒請益以上聞。天旨矜從。遽增多而下濟。仰蒙曲賜。內激危悚。維全魏之要都。當朔陸之孔道。軍校之所犒設。使人之所勞迎。向除兩府之舊臣。有緡謂之隨使。苟待四方之過客。在禮不致闕供。臣比

忝于居留。事頓裁于往例。去者大半。不承權輿。擗遺利以相兼。恐傷大體。告常貲之不及。妄叩淵衷。伏遇皇帝陛下。至德包涵。大明臨照。飾廚傳以自喜。知臣不爲。損府庫之有餘。如臣所請。乾坤施大。塵露報微。敢不益勵乃心。自矢清冰之節。庶幾勉供厥職。上酬洪覆之仁。

代元給事謝加勳并食邑表

親郊已事。灑澤均休。賜詔十行。轉勳一級。賦益爰田之數。寵深維谷之憂。伏念臣起自諸生。最爲孤仕。祗游揚于三紀。奚云補于萬分。頃貳大農。旋升近侍。引南州之紱。何有治功。籠北道之財。復無利術。會盛旦之展采。奉圓丘之肇禋。第羨諸侯之駿奔。敢嗟太史之留滯。固不能聽屬車之雷動。扈從諸塗。觀吉土之天臨。肅雍在位。適成熙事。例沐湛恩。併蒙異數之加。彌積罔功之愧。此蓋伏遇皇帝陛下。務均神貺。祇順天心。雖於穆猗那。已形容于美頌。而克自抑畏。弗享受于隆名。尙需洪私。俯延庶尹。敢不益圖忠藎。匪懈論思。誓畢微生。庶酬上德。

代王禹玉內翰謝兼侍讀學士表

玉署代言之地。老于文學之所居。金華進讀之聯。通厥古今而後預。兩塗踐一。已爲儒者之極榮。孤宦獲兼。茲實聖時之盛遇。而又華韜良駟。以安其體。美衣博帶。以文其容。難俯偃以循辭。輒服乘而拜祝。竊以佩服與德而相對。始免于譏。車馬稽古之所蒙。可誇乎寵。如臣者學未到聖賢之奧處。論或剽父師之緒。

色之狀。詎意上恩之博。遽加中講之崇。御府頒衣。天閑授駿。申錫副帶。環之麗。餽金增韉。葉之光。載省無堪。深虞不稱。洪私甚昵。屈名器之大公。危抱如丹。竭涓塵之少效。

代包孝肅公謝樞密副使表

伏以疏恩至渥。懼大取于時譏。瀝懇維勤。弗少移于詔意。勢不遑讓。寵其可驚。勉服華章。難安悸魄。伏念臣仕以孤進。術無他長。獨信樸忠之可持。不知徼幸之爲利。蚤際聖世。頃塵諫員。遇事輒論。以身當怨。殿邊隅之巨屏。曷暢遠圖。專江滸之孤城。訖無善狀。旋膺迅召。假尹中畿。近則賴天子之聰明。遠則學古人之鉤鉅。雖奸豪之稍戢。于暗拙以何功。誤聽朝僉。擢持風憲。紀綱之地。未能爲國體。而一言金穀之司。猥以付邦須之大柄。事端萃止。心計茫然。方虞官瘝。俄正使號。列讓封而懇避。曾未踰旬。綴陪幄之後塵。遽焉易地。在責愈重。揆才弗勝。然有時乎爲貧。尙且辭富。以前日不受是抑。恐今非而況。主計惟艱。運籌不易。議曉治亂。方能合四輔之謀。略具武文。始可究五兵之本。自視近器。曷參繁機。歷開不可之端。庶寢已行之命。愚衷第確。天旨靡回。俾附樞躔之末光。許聞廟算之餘論。此蓋伏遇皇帝陛下。大明如日。全度惟天。乃眷孤臣。不遺造物。舍盈庭之衆哲。特取菲能。忘假器之煩言。專融睿斷。敢不夙夜重寄。渴饑一心。切平世防微之圖。凜聖經慎戰之戒。誓畢餘齒。仰酬上仁。

代泗州盧郎中謝到任表

戚休千里。宜求外牧之良。忝冒一麾。茲實下臣之愧。揆恩至渥。引分何堪。竊念臣學弗名家。器難適用。尸

榮僅四紀。出守者數邦。罄竭鄙才。訖微善狀。而况沿汴置郡。臨淮據衝。舟車往來之繁。曾無虛日。金穀運輸之入。率由此途。俗薄好爭。地卑多潦。雖賢守長。猶艱智力之周。若臣愚蒙。曷稱要繁之委。此蓋伏遇皇帝陛下。乾坤其量。何細不包。歲月之勞。雖微亦采。使之治劇。敢不究心。宣布詔條之寬。變移風俗之厚。庶幾一得。云補萬分。

代泗州盧郎中明堂大禮陳乞次子恩澤表

伏遇國家詔舊禮之常。修合宮之饗。稀闕之典。事遽復于我朝。疎遠之臣。澤庶霑于厥嗣。輒披愚款。仰瀆聰聞。臣有次男某。生會右文。少知從學。以其本專儒術。未能自致于榮名。欲乞特授文資。所覬不違于素願。兼臣歷任以來。並無賊私過犯。伏望皇帝陛下。廓如天之造。推延世之私。曲軫聖慈。俯從臣請。如是則人神胥慶。喜曠制之舉行。父子知榮。荷茂恩之均及。

代泗州陳郎中待罪表

臣任叨守土。職在長人。不能宣諭教條。發揚孝治。曾無善政。撫共理惟良之稱。是致下民。抵五刑莫大之憲。竊以古之良守。名布冊書。因昆弟之忿爭。尚閉閣而致咎。而况子之毆母。事越常聞。傷教悖倫。莫茲爲甚。未能投紱引去。以謝匪才。是敢拜章自陳。恭俟黜典。

代待罪表

長人亡狀。致條教之不行。匹婦何知。抵刑科之莫大。臣謂古之刺史。名在冊書。悼昆弟之訟田。謝吏民而

閉閣矧茲同產。輒爾相殘。有傷孝治之風。其實守臣之罪。左符所繫。未能投紱而遂歸。甲令有文。是敢拜章而自劾。

### 代馬察院謝表

昨叨寵數。因揣器能弗稱。徽章乃呈。讓奏靡回。成命豈敢固辭。勉強拜嘉。兢慙失措。伏以憲府之選。官材實艱。論朝廷是非。舉臣寮過失。秩輕責重。受易才難。專一意以謹司。尙虞敗職。假他官而兼授。豈曰慎名。竊念臣發跡寒鄉。策名昭世。最爲平進。絕少他奇。畿縣補官。未施于寸效。庭闈遭禍。偶及于終喪。宦緒間關。生意衰落。會曲恩之延被。佐通漕之輸將。而且金穀數叢。江淮歲歉。僅充舊課。遽錄微勞。弗循官次之常。俾預臺中之列。布衣奉詔。有媿于祖風。赤芾貽譏。深防于物議。臣所以歷披悃愾。懇避龍光。渙渥不休。尸榮爲甚。此蓋伏遇皇帝陛下。乾坤覆燾。日月照臨。采臣銖兩之勤。欲有功知勸。加臣糾察之目。欲雖遠竭忠。敢不力樹壯猷。思稱上意。經營大計之暇。圖講當今之宜。國家之事。可言雖危不避。君父之恩。欲報之死無他。

### 代劉希道待制謝上表

獨當一道。兼拊六城。初見吏民。敢言師帥。第奉行夫寬詔。奚取稱于明恩。伏念臣比自孤生。驟叨近侍。進不由于累日。幸實出于遭時。言責所司。那避貴權之側目。計文云總。粗知功利之究心。僅此再拜。訖無寸效。會坤維之缺守。荷乾造之曲成。簡自淵衷。畀之重寄。食君之祿。義難取于便安。以親爲辭。情蓋緣于危

迫露章既上。悸魄弗寧。不能叱馭以爲忠。方爾闔門而待罪。適逢廣愛。特緩嚴誅。眷朔野之奧區。號常山之劇鎮。弗離舊部。就付要縶。待慈母板輿之來。近踰十舍。觀居民雲屋之盛。雄視四封。竊寵尤多。戴恩有所。此蓋伏遇皇帝陛下。至仁天冒。大度海涵。孝治之行。不欲一夫闕養。睿慈所及。尙容千里班條。敢不圖講政經。刺求民瘼。庶集涓埃之績。少酬覆載之私。

代都運趙待制謝上表

小材而臨大計。不知經畫之所從。薄量以涵厚恩。惟有思勤而可補。竊以今之北道。重曰外臺。邊宿勁兵。境控強敵。歲支洪河之備。而民力幾屈。所以艱于賦輸。地列數鎮之師。而吏員益繁。所以要在刺舉。宜擇精明彊濟之器。以付轉給澄清之權。若臣空孱。于事迂拙。曷引兩川之漕。近貳九農之司。率輟竭于愚衷。訖罕通于利術。敢期煩使。乃委孤臣。此蓋伏遇皇帝陛下。廓天地之容。收涓埃之細。特加不次之命。而欲勸來者。弗責已試之効。而俾懷後圖。得不夙夜以思。始終乃職。豈敢專聚斂之最。以上累于君仁。亦當拊凋殘之餘。庶下蘇于民瘼。

代張景元龍圖知成都府謝上表

優加職任。特私名器之大公。初見吏民。卽諭朝廷之廣德。才微責重。寵至懼深。竊惟益部之奧區。茲實坤維之劇鎮。有江山之控帶。兼民卒之撫綏。從來守臣。多采宿望。如臣甚陋。自視無堪。侍從最爲晚躋。技能奚適時用。更計籌乎內外。乏政績于毫分。及此踰年。遽云增秩。顧巨藩之所委。非小器之可當。而又煩使

向臨于兩川先臣嘗列于近職領蜀門之印綬曾是昔遊直延閣之圖書復叨世選何乃微躬之幸獲茲數事之兼此蓋伏遇皇帝陛下躬攬乾綱日新睿斷眷先朝之舊物記通漕之孤臣躡等班行之間推恩屏翰之寄敢不博求民隱祇訓戎韜坐布寬條底與情于安集力圖靖治副聖訓之丁寧

又

初見吏民卽宣條教任重而力不逮寵過而心若驚伏念臣江海微生朝廷孤士當龍德離潛之始方參貳于大農泊天心求治之間復總司于外計未嘗伸愚瞽之慮得以補聖神之聰忽蒙誤恩起置華選矧頃馳于單傳嘗歷使于兩川今茲守封實乃故地叱忠臣之馭雖媿于古人剖刺史之符獲綏于舊俗倍爲榮幸尤荷生成此蓋伏遇皇帝陛下躬攬權綱首敦勸嚮不責已試之驗而觀其後效特屈非常之命而激其壯圖遂俾短能亦叨劇委而且徑從便道祇赴嚴程阻瞻前旒弗克稟睿謨而後往務靖遠服庶幾虔詔旨以恭行

代漕使謝上表

才難稱職旣當煩使之劇權恩在圖新復冒從臣之舊籍寵緣任假感與懼并竊以維今外臺莫重北道邊控強敵成屯勁兵籠貨民間而惟恐涉傷財之名轉粟塞下而僅能供待哺之口而又歲支洪河之備而官用幾屈所以艱于運輸地列數鎮之師而吏員實繁所以要在刺舉苟虧精明強濟之具曷振轉給澄清之綱如臣空疎于事暗拙漫更委寄蔑著勞能比分師符偶陷吏議官非理去旣一跌于嚴塗咎止



退思已都忘于榮路。尙荷皇慈之寬置。每蒙法語之矜存。通漕朔方。果疏恩于不次。進班延閣。仍還職以如初。載省生成。率歸造化。此蓋伏遇皇帝陛下。乾綱獨運。神斷日新。進退朝倫。必清衷之自擇。予奪官序。絕浮議之可移。遂俾單庸。訖叨甄錄。敢不內殫愚慮。仰副睿懷。少見事功。庶酬靈覆。

又

小才之臨大計。未知經畫之所從。薄景之涵厚恩。尤懼寵榮之不稱。竊推諸路。並兼外臺。特陝西領使之難。蓋軍須自昔之爲重。緣康定用兵之後。顧民力至今而未完。籠貨關中。而惟恐涉傷財之名。轉粟塞上。而僅能供待哺之口。加用度之百出。無利源之一遺。而頻年薦饑。常賦罕入。在平時之無事。尙或須才。方近日之饑邊。豈容冒選。宜得老于金穀之要術。號曰朝廷之能臣。俾總漕權。始安物議。如臣暗拙。于事迂疏。曾微日月之勤。第幸風雲之會。預嚴塗之陟降。迨此彌年。董朔野之輸將。止于踰月。驟更劇部。誠出誤恩。此蓋伏遇皇帝陛下。曲軫清衷。弗遺舊物。蓋念自塵于侍從。未嘗少建于事功。使効微勞。免慚空食。敢不內殫愚慮。上體睿懷。雖云轉給之司。務充常課。不爲聚斂之計。取累至仁。

代謝進和御詩獎諭表

參羣篇而奏御。廣載非工。被優詔之發中。褒嘉甚渥。惕然拜君父之賜。藏以爲子孫之榮。伏惟書曰帝庸作歌。所以極道明良之意。雅云臣能歸美。所以上酬福祿之辭。惟千載一時之逢。踰三王二帝之際。乘太

中宸于時從聯。咸續睿唱。如臣者有樸愚而植性。無文采以表身。自陪風憲之要司。都廢微言之舊學。安  
執鄙思。綴成斐章。大樂在前。發哇聲而接響。太陽臨下。銜燭火以交光。旣瀆遂旒。若臨深谷。敢謂兼容之  
度。例行過獎之辭。游聖門者。謂之難言。矧繼堯文之後。踰華袞者。重夫褒字。況蒙漢訓之加。夫何孤臣。叨  
此厚幸。此蓋伏遇皇帝陛下。齊德乾覆。育材士倫。善雖小而弗遺。力或矜其不逮。誓竭講劄之效。庶酬勉  
勗之仁。

代謝進職表

恩數推優。禁聯增峻。名浮已甚。寵至惟驚。伏以本朝啟宸構以藏書。憲義圖而署目。因名學士之職。以擢  
從臣之才。所宜識際聖微。術鉤經奧。俾塵清選。迺稱徽章。竊念臣一介單寒。片文猥瑣。蚤緣曲藝。輒冒異  
科。幸旣出于逢辰。仕不由于累日。參憲臺之風議。無所建明。預財府之權謀。曾何經畫。姑守愚而斂分。敢  
躡等以越思。亟叨內閣之華。密奉前旒之邃。固未能發揮儒效。藻潤帝猷。會邊閫之須人。假州麾而出守。  
樸忠自信。已誤簡于睿心。闇懦少機。弗過防于讒口。果飛疑似之語。仰瀆聖神之聰。蓋孤根之易搖。致謗  
蝕之肆起。尚賴睿慈垂惻。皇鑒照微。止頽尺一之書。移總東南之漕。荷知臣之至哲。堅報國之初心。雖金  
穀數叢。江淮問歎。力經大計。未始寧居。旁均百郡之輸。仰給中都之費。偶充歲課。僅免官瘝。遽收采以寸  
勞。加顯嚴于近署。況臣閒關官路。久去于清光。鞅掌利權。悅迷于舊學。拜嘉非稱。竊幸居多。此蓋伏遇皇  
帝陛下。天造曲成。帝暉下燭。以臣夙因會過。嘗備使令。簪履之舊。弗捐靡遺。于頽使。毫髮之功。亦獎示勸。

于勞臣。特假龍光。濫延疏外。敢不激昂志尙。究悉事爲。誓策疲鷲。庶酬覆露。

代百官謝御筵并傳宣表

順理大川。實由王道之正。推慈廣燕。益盡臣心之忠。馳遣使人。宣傳法語。涵濡睿渥。鼓舞輿情。恭惟皇帝。陛下。總攬萬幾。畢張百度。眷言二埽之決。尤動數城之憂。塞故開新。雖交陳于羣策。取長舍短。緊獨斷于淵衷。亟興厥工。陰有所相。如期底績。飛奏告成。蓋建中克應于天心。故潤下不違于本性。爰卽會府。以頒慶筵。廣坐多權。同聽鹿鳴之什。寧朝信史。復紀河平之年。

代謝生餽表

載誕丁辰。方集已孤之感。匪殞列品。俾供式宴之私。出拜王人之命于庭。入聞宗黨之慶于室。恩榮相照。喜幸交深。伏念臣偶以樸忠。驟當睿選。智小不足以識大體。才近不足以經遠猷。自坐論于中階。殆空餐于厚祿。第懼煩言之起。敢希飫賜之臨。豈謂皇帝陛下。分篤君臣。禮優承弼。記其生日。將以懽恩。均肥旨之醪牽。加精甘之麴糵。仰對需雲之施。愈慙鼎食之浮。飽上德以何厭。醉皇慈而難酢。惟勤夙夜。稱今日之所蒙。稍立事功。庶爾生之無忝。

代元給事壽聖節進功德疏表

王春謹始。遙臨月魄之成。聖運發祥。嘗紀電樞之繞。蒼精出震。炎歷承乾。會載夙之初辰。洽均懽于率土。

河沙而莫數第極後天之祝曷勝向日之誠

代趙都運壽聖節進奉功德疏表

歲聿發春。月茲成魄。當五始書王之後。迺千齡誕聖之初。繞電流虹。蚤開于瑞應。普天率土。均沸于懽聲。臣是敢叩金地之莊嚴。面玉毫之奇妙。恭延淨侶。積演祕文。覬不盡之勝因。資無疆之睿算。第切後天之祝。曷勝向日之誠。

看詳

看詳知開封府度支郎中王克臣所進熙寧通議

臣看詳。政簡厚則民說而不擾。是以有樂生之意。而富壽臻矣。三代所以得民心者也。夫欲行王道而不先乎此者。戾也。是以簡苛禁。厚仁術。戒吏祭之爲明。而本乎恕。知民力之有限。而用以節。皆爲政之所宜急者。

臣看詳。君子勸不待賞。沮不待罰。惟賞罰所以待衆人。然賞過乎輕。不唯失勞。而又沮爲善之效。罰過乎重。不唯失罪。而又賊人恩之大。茲二者。實近世尤病。願詔有司審處之。

臣看詳。冗兵之可汰。戍卒之可損。固已汰其所可去。而損其所可留矣。若方今未革之弊。知理財之爲急。而不知耗財之所漸者。增置官局是也。以其所得而不補所失者。數易利柄是也。置苟不一。則財不勝耗矣。易苟不已。則失不勝計矣。望員品之清。府庫之實難矣。

臣看詳有警則嚴兵備。無事則惜兵費。類皆能言之。殊不知費有不得已者。而備不可一日弛也。譬如巨藏之家。曰固吾堂室。而藩牆不足守。曾不知外圍既虛。則固於其內者。將不能獨恃。噫。備之不可廢於邊也如此。況近年戍卒。其分此近郡者。不爲不多矣。若又損外而益內。安知契丹專利吾金縢。而不窺邊備之虛實也。

# 祠部集卷十七

狀

賀韓魏公生日狀

素商肇序。元精萃在于金行。大昴儲祥。上相出符于寶歷。維時載誕。與國同休。恭以判府司徒待中。道濟王塗。望高宰路。功名自著。而避遠無跡。德爵極隆。而持循以謙。一己安行。而有餘。衆心仰慕之不足。卷三朝之鉅業。久退守于宮符。撫千里之環封。復懇紆于鄉紱。門弧戒旦。鼎食增榮。宜壽而臧。合萬辭而祝頌。若富與貴。永百福之崇高。某適倅計庭。正遙恩館。馳歡誠而第劇。就慶列以無從。北望台光。卑情無任。激切瞻禱之至。

賀樞密富相公加戶部尙書狀

伏審誕敷內命。具告外廷。進長地官。增崇台序。伏惟慶慰。恭以樞密相公。器包民極。勳濟王塗。洞安危之大機。更文武之二柄。宰庭論道。尙存鄼侯之舊規。樞幄本兵。不聞冒頓之南牧。兩朝感會。一德將明。遴繼聖之重光。采建儲之前議。特加峻秩。示獎元勳。雖懇列讓。封隱廟謨。而弗有。而勉從制冊。激朝論以逾高。上富資政狀

向紆守紱。逃遠台符。當淮州囂冗之衝。積官簿沈迷之慮。馳心材館。徒爾增勞。奏記鈴齋。缺然不講。伏惟

布黃堂之政事。萃秦宇之福禧。恭以某官。道簡上心。名重天下。高文大冊。蚤中于賢科。要職美官。獨揚于聖世。將命絕域。能尊大于本朝。避寵鴻樞。益光華于全德。進升祕殿。出領巨邦。綏一州之氓。惜利澤之未廣。調大鈞之化。庶中外之咸依。行奉詔書。入居鼎席。

賀樞密張太尉加吏部侍郎狀

伏審顯對冊書。增崇命數。優國老之舊德。進天官之亞鄉。邸報初聞。朝論胥慶。恭以樞密太尉。天民先覺。王佐偉才。抱忠諒之一心。出誠明之正性。參鼎司而調萬化。清風尙存。坐宥省以論五兵。白首逾厲。適報受遺之德。遽疏進秩之恩。垂光中階。登貳冢宰。鴻樞之祕。想妙略之咸依。赤松之遊。追先分而未可。永言企躍。曷盡敷云。

賀參政趙侍郎加吏部侍郎狀

伏審帝制發中。天官登貳。挺陶所暨。喜躍惟鈞。恭以參政侍郎。道備將明。德含惇大。忠言坐斷乎國論。文體追還于古風。自結主知。歷紆賢業。拜先皇于臥內。親受遺言。出嗣聖之宸衷。特崇舊德。加峻中臺之貴秩。益光近輔之榮班。某總計朔陲。馳誠翹館。願業官之有守。思展慶以無從。

代賀向少卿狀

伏審宸檢疏恩。月鄉進秩。暉映之下。躍抃兼常。恭以某官。亮節在廷。懿文表世。榮寵紳綬之貴。慶鍾圭袞。

之來。俛惟冗微。鎮卜棲倚。

代賀李參政狀

伏審帝詔登賢。宰庭進序。誕鎔所暨。權躍惟鈞。恭以某官。上天元精。清廟偉器。行出世表。文爲人師。識度宏深。夙稱大臣之業。忠誼肅正。自結真主之知。遽遠京邑之雄。徑宅廟堂之貴。圖講治安之策。今也其時。樹立太平之基。決于匪日。九州四海。萬口一辭。某適貳守符。逖遙台屏。雖聞風而增忭。惕馳賀以無階。

代賀待制諫議狀

伏審入覲宸旒。峻躋諫闕。側聞新命。竊忭丹悰。恭以某官。莊重自居。直清不倚。早逢文雅之會。優踐廉良之科。回翔顯塗。暉映當世。早居侍從之職。屈領事爲之權。掌通漕之司。方凝于茂績。奏甘泉之計。密簡于上衷。遽兼內閣之華。驟置七人之列。金穀之委。聊愼于才難。鈞衡之崇。佇膺于冊拜。卽圖趨伏。併述忻翹。

代賀梁副樞改給事狀

一違牆宇。久偃鄉邦。有簿領之櫻懷。習成慵放。顧音函之布問。坐致闕稀。茲承疏渥。嚴宸登賢華序。矧叨暉庇。實倍忻愉。恭以某官。莊重自居。直清不倚。逢辰熙穆。筮仕光亨。飛綏金馬之廷。早揚仙貫。視草玉堂之署。密暢宸猷。日侍奉于威顏。位益隆于體貌。鴻樞之府。參掌于繁機。青瑣之門。驟光于寵拜。矧時所傾。屬上方倚毗。咫尺三台。行據真相之業。仁壽億姓。以畢大臣之能。

代賀歐陽龍圖知府狀



伏審光奉制書。就移治屏。伏惟欣慰。恭以某官。際天蘊識。名世標才。允極將明之資。以基太平之業。屈司宮鑰。鬱四海巖巖之瞻。行被宸緝。宅上台兩兩之曜。

代賀文相公狀

伏審恩章均霈。冊命發中。慶與國均。榮動物聽。竊以昊天著象。酌氣者機衡之司。皇國設官。賦政者喉舌之任。審是要選。歸于宗工。恭以某官。上台元精。清廟偉器。歷二府之重委。踐三槐之絕班。晉公底淮右之平。入持宰柄。山甫補周家之闕。遠踵賢規。大屬股肱之良。益隆體貌之地。某職貳方郡。跡遙廟堂。馳賀無階。企悚良極。

代賀發運待制狀

伏以寶典履長。盛儀亞歲。義易紀其來復。魯史載夫望書。恭以某官。才貫幾深。德涵剛實。外臺重委。誠曰藉才之司。內閣邇聯。決非久次之地。順迎令序。誕擁龐祺。某適守賤司。不獲躬詣。塔墀稱慶。卑情無任瞻頌。激切悚惶之至。

代賀運使張刑部狀

伏審寵承鴻渥。榮改清郎。伏惟慶慰。恭以某官。業履蹈中。才猷彪外。洵更重委。率著能名。括地賦于列城。實關心計。陟秋官之要秩。茲副恩章。俛惟下寮。方備屬吏。側聆甄擢。倍萬忻愉。

代賀許發運賜出身狀

伏審光被詔音。榮升科等。側聞異數。陰忤丹棕。竊以國家圖講聖治之端。追救時文之弊。以有司持尺寸之度。豈盡得人。而賢者具經濟之資。或艱申第。爰頒不次之命。以擢非常之才。恭以某官。識洞深幾。學探精蘊。雄文大筆。自結于主知。細札溫書。特躋于賢選。天下知勸。朝論加優。燕賀良深。葵忱曷罄。

代賀龐昭文狀

伏審就膺制冊。升冠宰庭。成命旣行。有生同慶。恭以某官。高文經世。鉅業代天。道誼致君。忠諒行己。間綏邊闕。旋貳樞廷。寢隆萬乘之知。參斷三公之論。底邦猷于甚盛。密簡中宸。隱廟略而勿居。一歸上袞。遽正元台之位。以彰真相之才。廟堂之號得賢。莫先今日。區夏之觀至治。計在匪朝。某職預漕臺。迹遙政府。亞紳綏之懽蹈。邈矣無階。託鈞冶之誕鎔。幸而有地。

代賀陳維端狀

伏審榮改諫聯。就登憲職。伏惟慶慰。竊以臺選之妙。官材實艱。言朝廷是非。糾臣僚過失。其膺慎簡。允屬宗賢。恭以某官。行潔性醇。德宏業鉅。高文大冊。早中于賢科。美職要官。進揚于聖世。才爲時而傑出。道遇主而盛行。間分九五之憂。往撫東南之地。全安罷俗。宣諭至仁。甄擢俊長。抑黜姦懦。迨使車之還止。果宸辰之嘉焉。開英袞之便塗。濟繡衣之上笏。彌縫庶政之闕。今也其時。樹立太平之基。決于匪日。俛惟冗瑣。舊入獎憐。新命傳聞。寸衷竊忤。訖恩成而有地。從賀列以無階。

又

祇服恩華進更臺選。伏惟慶慰竊以國家深講至治。並登偉人。風議所關。憲職爲最。糾朝行之過失。正色不回。論邦體之是非。危辭無避。其膺妙簡。允屬宗工。恭以某官術業宏長。才猷膚敏。見不忠于君者。直哉必言。苟可利于國乎。行且弗顧。曷領嚴宸之命。盡觀列郡之風。升賢黜姦。扶弱抑蠹。迨旋崇旆。入覲邃旒。宣詔意而甚明。果上心之稱允。繡衣劇序。聊示於徽章。英袞絕班。行光于寵拜。

代賀陳相公狀

伏審寵建使旌。榮兼相印。仍躋祕殿。復鎮舊藩。伏惟慶慰。恭惟某官。社稷宗臣。山河間氣。秉直道以結人主。挾重計以尊朝廷。鼎宅鼎司。首膺晉錫。裁黜貴倖。振拔滯淹。窒塞濫源。啓闢治路。底邦猷于甚盛。密簡嚴宸。避廟略而弗居。懇辭上袞。部守符而均佚。露公冕以觀風。卷康濟之大。而就一州。遂蕃宣之樂。而鬱四海。帝心久注。恩數推優。謂體貌舊臣。宜帶宰臣之序。欲節制諸郡。因加將鉞之雄。禮意甚隆。輿言弗愜。一相處外。勞周伯之來歸。萬民具瞻。望晉公之再入。行膺徽冊。還陟元台。曾是疎頑。嘗依誕造。頑金待器。更期大冶之開。廣廈旣成。敢效翹飛之賀。

代賀發運鄧郎中狀

伏審祇奉茂恩。出司通漕。側聞成命。竊忭寸襟。恭以某官術業宏長。智謀膚敏。郎垣應宿。蚤躋位著之嚴。使節宣風。游領事權之劇。旋聞名于法坐。亟佐職于財闈。眷言淮海之輸。實備邦家之計。董外臺之轉給。宜得周才被溫詔之褒升。允資碩畫。俛惟屬部。將庇末暉。欣幸交深。名言非悉。

又

伏審祇奉恩函。總司利柄。竊以中都之費。率繫通漕之供。乃簡周才。以分重寄。恭惟某官。中和迪哲。亮直秉彜。謹漕節之輸將。洊登最狀。參財闡之經度。久試豐功。遽爲聰哲之知。都領東南之計。俛惟儒品。嘗庇末光。復依使旆之嚴。不失君軒之舊。永言慶忭。倍萬等倫。

又

伏審進膺宸誥。出總使臺。將託末暉。預深竊忭。恭以某官。行推高爽。道具醇全。邁復旦之聖期。踐列星之郎位。備紆賢蘊。自結主知。洊持漕節之嚴。入預計廷之劇。綢繆利柄。歷詳金穀之原。蒙被朝僉。都領江淮之運。物論皆允。邦須所依。俛惟下寮。行備屬吏。永言欣幸。曷究名言。

代賀施龍圖狀

伏審北轅按部。中路改恩。罷總漕臺。往司官鑰。伏惟慶慰。恭以某官。器包民極。勳濟王塗。親對休辰。洊揚臚仕。領邊藩之劇部。參財省之偉謀。風績並凝。褒章增峻。邁升延閣之祕。益注嚴宸之懷。董大計於東南。久煩經畫。副具瞻于中外。差緩升庸。遽被溫書。暫班寬詔。俛惟屬吏。夙荷恩私。歡戀並懷。指云非諭。

代賀錢侍讀移青州狀

伏審光膺細札。移殿巨藩。伏惟慶慰。恭以某官。方格淳脩。器識宏遠。高文大冊。早決于世科。至論昌言。有裨于國體。進直禁局之祕。旋陪乙夜之觀。禮遇益隆。地望絕擬。輟居嚴署。出守南麾。已躋雅俗之安。靡俟

更書之滿。朝端上袞。差緩于登庸。京左數邦。聊繫于鎮撫。卽光冊拜。大副巖瞻。

代沈主客賀文侍中知永興狀

進膺冊命。出布政條。伏惟慶慰。恭以某官。王佐偉才。天民先覺。濟極功于天下。暢鉅業于朝端。蚤躋台序之嚴。旋宅宰司之冠。蒐闕儀之未講。墜典畢脩。晝常憲于可行。成規永賴。去終禮制。起應詔音。建淮海之高牙。鎮關河之巨屏。式是遠略。穩如長城。繫樽俎之前籌。寬朝廷之西顧。外蕃主室。暫勞申伯之行。歸秉國鈞。再俟晉公之入。伏望上爲宗社。精調燕輿。

代賀知府李密學狀

伏審祇奉制音。就觀畿政。側聞新命。竊忻寸襟。恭以某官。經世偉才。薦紳碩望。由妙年而取上第。不累日而都要官。亟自禁林之遊。徑登樞府之直。時論歸重。上知愈明。京邑四方之表儀。翕騰于尹治。宰廷百辟之師帥。當被于朝僉。咫尺聰聞。旦夕冊拜。未遑馳慶。先辱占書。媿喜并深。名言非諭。

代賀安撫太保狀

伏審肅膺朝命。出諭上仁。拜德有階。普天共慶。恭以某官。識度沈遠。機神迅清。名簡萬乘之心。才兼數器之任。帝念東南之郡。民罹水旱之年。分使臣之光華。奉承溫詔。布天子之惠愛。撫慰羣元。某適守陋藩。行瞻嚴施。永言企忭。曷究文陳。

代賀青州文相公狀

伏審就膺細札。移鎮巨邦。凡出埏陶。惟均忭躍。恭以某官山河間氣。社稷宗臣。道遇主而盛行。位因功而數易。運神機于樞幄。纔服華章。參正議于鼎司。遽更徽冊。方將緝熙當世之緯。舒暢蒼生之心。會狂孽之悖常。嬰孤城而假息。獨形忠憤。請殄姦妖。廟算略施。寇巢隨破。晉公登用。最高平蔡之勳。傅說贊襄。休有弼商之策。追合宮之闕典。一旦舉行。詔列郡之禮闈。同時開設。少見大臣之效。弗殫真相之才。露冠冕以觀風。剖守符而均佚。朝端上袞。矧久鬱于民瞻。京左數邦。復暫勞于君重。行祇明命。還宅元台。曾是孤生。嘗叨清舉。請假書林之職。俾兼漕節之權。雖寢曲恩。如沾大賜。自違鈞屏。尋總計臺。第切歡誠。阻從賀列。

代賀宋內翰移鎮狀

伏審祇奉明綬。移東巨鎮。伏惟慶慰。恭以某官民靈先覺。王佐偉才。道簡上心。名重天下。升華延閣。蚤潤色于宸篇。翔步禁扁。久發揮于內命。旋陪乙夜之覽。允極丁辰之光。固宜陟降。王塗優游。公路遽出。觀于藩政。已外鬱於巖瞻。復被恩函。改臨邊闕。眷惟中國之望。恃若長城之堅。綏懷遠人。節制諸郡。講兵民之利疚。考風俗之便宜。行聞氏羌悚威。固無南牧之意。朝廷倚重。不復西顧之憂。紀績王常。調元台鼎。某適司通漕。方庇末光。亟聞新命之行。徒劇懦衷之戀。葵傾倍切。燕賀無階。

代賀制置端公狀

伏審拜嘉。朝右進秩臺端。凡被埏鎔。惟均慶慰。竊以國家盛重。中都之計。率繫通漕之才。謂金穀之繁。尤關乎要務。而歲月既久。茲見于成功。將大升庸之階。故先雄劇之序。恭以某官性與道會。器隨用周。遂冕

對敷方嘉於碩畫。法冠直指。遽踐乎榮班。恩出主知。事光物論。矧繡衣之上笏。卽英袞之便塗。時議皆然。愚言非佞。俛惟屏薄。最辱獎憐。新命傳聞。喜踰於他等。賤司嬰繫。跡阻於前趨。企悚攸深。名言匪悉。

冬至賀錢內翰狀

寶典履長。盛儀亞歲。羲易紀其來復。魯史重夫望書。恭以某官。業術崇高。智謨光大。厭禁林之久侍。聊以觀風。暢台袞之偉謀。行聞祇召。順迎令序。誕擁龐褭。某守在小邦。跡遙巨屏。祝南山而爲壽。適阻前趨。託縑幅以貢音。曷殫下懇。

代賀張刑部得替狀

伏審顯膺召節。榮解利權。行乘卓馬之朝。入覲蒼龍之闕。良階柄任。增忭襟襟。恭以某官。風業宏長。才謀膚劭。自領漕臺之劇。益爲宸辰之知。給食京師。已報輸將之最。敷休軒陛。佇嘉經畫之明。亟列近嚴。庶符頌願。

代賀省副端公充待制狀

伏審祇奉恩函。榮躋禁職。側聞顯命。竊忭丹襟。恭以某官。識宇宏通。才謨高亮。對休辰而逢吉。揚臚仕以開榮。蚤爲聰哲之知。出總東南之漕。剗去積弊。樹成新規。力董輸將。矧勤勞于十稔。訖繫幹濟。已瞻足于中都。固風績之茂焉。果上心之嘉乃。適因奏計之便。遽被疇庸之章。對命嚴宸。升華延閣。訂茲慎選。誠曰當賢。籠金穀于百城。暫還舊物。秉機衡于二府。佇拜明恩。

代賀張待制知揚州狀

伏審解麾吳服。移鎮淮壖。審卽便時。已開尊府。伏惟慶慰。恭以某官。秉心峭介。懋德優宏。素履清風。最高乎時論。美官要職。歷踐於班榮。蚤居延閣之華。累典名城之重。蘋洲舊俗。方結于去思。蕪城故知。尙嗟于來暮。適兩轡之稅駕。班寬詔以觀風。靡俟政成。行光柄任。

代賀發運端公授省副狀

伏審顯承恩詔。進貳財闈。成命已行。寸襟竊忭。恭以某官。才兼數器。名重當時。弗援強近之知。自結聖神之眷。兼臺綱之美秩。總漕節之劇司。給食京師。矧風猷之久懋。敷休軒陛。會歲課之告成。亟嘉經畫之明。旋被褒升之渥。亞計廷之要職。方倚國才。暢台路之密謀。行光寵命。俛惟疏冗。最辱獎題。適領守符。阻從賀列。

代賀運判賜章服狀

伏審被詔發中。拜嘉不次。伏惟慶慰。恭以某官。鍾氣間傑。爲時聞人。名動搢紳。道結當辰。高文大筆。自取于要官。鉅業周才。遽當于顯用。乘江淮之歲歉。加金穀之數叢。力暢偉謀。助成大計。果申慶典。以錄豐功。將興歎於能臣。乃疏榮於品服。王恩至當。物議皆然。某適貳守符。阻陪賀列。瞻言使旆。曷諭愚悰。

代賀二漕改官狀

伏審歲課告成。星垣增峻。公庥所暨。私忭惟均。恭以某官。名重搢紳。才兼數器。被邦家之選遇。蚤暢賢謨。



董山海之輸將。洊登最狀。旋承鴻渥。進改清郎。矧繫碩畫之明。更聽茂恩之擢。屬官居之有守。趨慶列以無階。企悚交深。文陳非諭。

代賀副樞給事狀

伏審顯承明制。參掌繁機。成命既行。有生胥慶。恭以某官。智謀光大。業履崇高。挺金石之純誠。抱廟堂之偉器。忠言坐斷乎國論。亮節素邀乎主知。間倚重于翰垣。將往綏于邊闕。遘谿會之艱強。憑富險以繹騷。議舉靈誅。僉推碩畫。方使旌之就道。俄宸詔之命還。果廟算之萬全。破寇巢于一舉。泊聞大凱。因答豐功。拜嘉青瑣之門。貳職鴻樞之府。圖講治安之策。今也其時。樹立太平之基。決于匪日。佇更徽冊。進陟元台。副函夏之具瞻。畢大臣之能事。俯惟愚品。久託鈞庥。散木弗材。常荷先容之賜。頑金能躍。更聞大治之開。第劇歡誠。阻趨賀列。

代賀何龍圖移慶州狀

伏審茂對宸縉。就更藩闔。受知有素。忭躍惟深。恭以某官。才爲世生。道先民覺。蚤署含元之上第。旋直承明之祕廬。當辰以忠誼知名。薦紳以文章矜式。俄持太史之筆。久列侍臣之班。益峻恩章。遄升禁列。眷惟治屏。俯控西陲。宜得國楨。以綏邊俗。用恩威之二道。專節制于一方。隱若長城。暫繫于坐鎮。霈然中詔。行趨于登庸。某適貳麾符。阻趨旌棨。遙瞻使節。曷罄愚誠。

賀得替都監王殿直狀

伏審告成美課。入覲嚴宸。驟奪公麻。第增愚戀。恭以某官清端不倚。沈毅有謀。董師律于方州。適茲滿歲。佐戎旂於邊闕。其在匪朝。倍慎寢興。以酬光渥。

賀田告曹移令狀

伏審顯奉宸緒。就紆縣紱。伏惟懽慰。恭以某官器資夷遠。品格端嚴。決科妙年。掾郡更歲。薦書交上。劇論于美材。褒詔亟頒。優分子便邑。未遑修慶。先辱占音。感忭并深。名言非悉。

賀金華著作狀

審卽便時。已臨劇邑。方棲餘庇。竊忭丹悰。恭以某官學有本原。性函剛實。參華金馬。茲漸于清塗。分寄銅章。遂據於素蘊。宿官所限。稱慶莫前。瞻扑交深。名言非諱。

賀文潞公狀

伏審肅卽便時。肇臨宥省。神機所總。福祚具蕃。恭以某官涵德淳深。秉彜光大。協風雲之盛會。揭日月之貴名。早冠序于宰塗。迄致平于王路。比煩遠略。往殿劇藩。建淮海之高牙。方開尊府。挹河汾之間氣。趣覲清光。夙推英袞之謀。首付鴻樞之柄。方隅無事。暫賴留侯之運籌。廊廟有聲。復歸蕭相之畫一。嚮熙朝之偉績。收高世之極功。鐘鼎所銘。邦家之耀。俛惟衰晚。訖託誕鎔。第內激于懽誠。阻前陪於慶列。

代趙待制賀昭文相公加左僕射狀

伏審誕膺徽冊。祇服華章。進升右相之尊。增重元台之體。伏惟慶慰。恭以昭文相公。世濟人傑。道包聖微。

揭日月之高名。會風雲於先帝。奉綴衣之求命。定策禁中。暢英袞之偉謨。立功天下。上念大忠之力。恩推異數之文。加峻秩于天臺。光元勳于王室。傳聞成命。舉慰具瞻。某職總利權。身遙材館。阻從慶列。第劇歡誠。

代趙內閣冬至賀昭文相公狀

伏以在復之來七日。陽德其升。建子之貫三微。王心所慎。恭惟某官。先識經世。元勳格天。衣冠百工。鈞冶萬彙。繫安危于天下。感會兩朝。輔左右之廷中。周旋再紀。適臨慶序。翁受純禧。具瞻之石巖巖。永堅民望。相比之星兩兩。增耀台光。某兼冒從聯。總司漕節。薦壽觴而莫及。跂相閣以逾勤。

代李才元學士賀西京文相公狀

伏審就膺徽冊。更尹別都。尊府初開。搢紳均忭。恭惟某官。器包民極。勳濟王塗。蚤殄寇巢。旋持宰柄。履正德以表庶位。挾重計以尊本朝。蒐未紹之闕儀。適殫能事。暢無前之偉業。重享成功。措邦體于既平。隱廟謨而弗有。踐崇高之極。而自鈞出處之致。斂康濟之大。而樂就蕃宣之勞。亟換左符。兼升右揆。列讓封而避寵。順成命以居留。然而幅員蒼生。咸願晉公之再入。坯治舊物。豈忘周尹之具瞻。行對宸緡。復調台鼎。

代賀何舍人狀

伏審宸緡疏渥。法從登賢。向聽朝僉。預伸而賀。旋承拜命。適偶戒行。徒增忭于寸襟。阻裁誠于尺牘。竊以

鉅細早躋諫垣之祕列。亟踐禁廷之貴游。丕變時文。一至古道。載筆書萬代之法。茲爲儒榮。持衡宰四海之平。猶鬱時議。矧注錄之上笏。卽登庸之便塗。行奉詔音。驟光冊拜。某嚮緣同籍之分。嘗被虛襟之容。逖聞褒升。倍深茂悅。

代賀韓舍人狀

伏審茂對恩書。榮躋法從。側聞褒擢。陰切欣愉。恭以某官。器資淳修。業術精奧。早逢文雅之會。優陟秀廉之科。華要洊揚。聲光愈綽。方載言于法座。俄給札于禁林。有文章溫厚之才能。體詔意代誥。令宣明之作。遽當上心。行追三代之醇。遠駕二京之右。殫儒者之顯效。宜鄰哉之近班。

代賀安撫陳舍人狀

伏惟某官。品格淳修。才猷膚敏。言經邦國之體。學際天人之交。道簡宸襟。地嚴諫署。珍策重計。施諸當世。而可行。要職美官。不由累日而自致。出宣溫誥。溥諭上仁。行入對於清光。亟徑躋于嚴近。順迎令序。誕集純禧。某別乘庀司。矧宿官之茲限。南山與祝。固介壽之莫前。

代賀李刑部移襄州狀

伏審就蒙細劄。移鎮巨藩。伏惟慶慰。恭以某官。經世偉才。搢紳碩望。露章懇郡。方俞詔之褒優。當軸須賢。行寵恩之升擢。伏望上爲邦國。精調燕輿。

代賀張待制移揚州狀

伏審膺圭符之寵寄。易淮海之奧區。肅東剛辰。已頒寬詔。俛惟陋壤。獲邇大邦。榮庇末暉。喜踰常等。恭以某官。才猷高亮。風績宏長。早會遇于聖辰。久翺翔于禁職。解吳興之郡印。尚仰褒書。旻廣陵之守麾。復開督府。露章按罪。方紹昔賢之風。加秩賜金。行光循吏之目。某適膺州檄。阻叩賓閣。從慶列以無階。馳懦衷而第劇。

代賀廣州王少卿狀

伏審茂對明縉。就移巨屏。躋奉常之少列。兼文館之祕聯。蓋以國家慎重長人。愛綏遠俗。因推不次之命。以付非常之賢。登庸出于此塗。權頌均乎衆口。恭以某官。直清不倚。莊重自居。行高薦紳。名記當辰。雄文取重于時論。大雅追還于古風。董淮服之輸將。瞻神都之供億。才周數器。勳濟本朝。督府千兵。暫臨南海之鎮。溫書一札。行陟中台之階。俛惟下僚。久備屬吏。側聞異數。竊忭寸襟。藐如嬰兒。驟奪慈母。茶若疲馬。止思故軒。喜戀交情。名言非諛。

代賀湯都官狀

伏念自奪恩暉。寢更月所。門墻愈遠。牋牒不時。豈謂不遺冗賤之蹤。特賜丁寧之誨。拜而伏讀。藏以爲榮。旋聞入奉明縉。寵更巨屏。庇廕之下。喜忭兼常。恭以知郡都官。秉節直清。賦才雄健。會龍飛之復旦。被龜紫以光朝。出守之領使麾。矧隆帝渥。衣繡之過故里。茲實儒榮。趨伏非遙。瞻依倍切。

代賀正上亳州宋侍讀狀

恭以某官學際天淵。名重纓綸。早陪乙夜之覽。允極丁辰之榮。翔步王塗。居勞侍從之事。班條侯闔。出詠中和之詩。順履慶辰。具膺景福。宅上台而秉軸。諒在匪朝。祝南山而奉觴。莫遑爲壽。

代賀正上昭文相公狀

斗初建寅。帝出乘震。西京講物。允重三元之朝。東國著經。實尊五始之月。恭以某官山河間氣。社稷宗臣。挾重計以尊朝廷。秉直道以結人主。位隆公袞。勳濟王塗。太平之策略行。已盡至治。畫一之歌繼作。第守成規。坐掄大猷。首調元粹。廟堂之上。深暢于偉謀。旒辰之間。日傾于正誼。聊觀風於雅俗。因均佚于陪京。須五月之政成。復三篇之冊拜。伏望順迎令序。誕擁龐禡。南山之石巖巖。鎮爲民望。泰階之星兩兩。永耀台光。某職列漕端。迹遙相閣。薦壽觴而進拜。阻預後陳。貢慶牘以浼尊。曷涯下悃。



# 祠部集卷十八

狀

## 代冬至賀諸官狀

寶典履長。雲臺視朔。復天陽於七日。亞儀會于三朝。恭以某官。洵直懋功。融明迪哲。發揮當世之務。茲鬱於賢謨。綱紀列城之風。聊分於使領。順迎令序。誕擁龐瀝。某適限他司。莫前爲壽。傾瞻抃頌。曷諭下情。

## 冬至賀鄰郡知州狀

一陽肇新。萬寶伊始。合陰陽之交讓。步珠璧以聯輝。恭以某官。才爲吏師。學際聖闈。頒條治屏。聊鬱於遠謀。鳴玉嚴塗。佇揚於華貫。導迎令旦。集受繁禧。瞻禱所深。名言匪悉。

## 代謝運使工部保舉狀

某自少也賤。實今之愚。學弗名家。力徒稽古。一竊科籍。久糜祿鍾。間關四紀之餘。忝冒數州之寄。唯臨淮之陋壤。乃沿汴之要區。自領一麾。僅彌期歲。事弊未革。民瘼尙留。日虞官瘼。以底吏責。豈謂某官。曲矜儒介。特賜甄揚。掩其疏短之才。謂可劇煩之使。親形封奏。上達冕旒。感積於中。望踰於始。昔者楚諺。珍季布之諾。不啻得金。魯經尊仲尼之褒。有踰贈袞。竊欣幸會。迴越舊聞。敢不佩服。攸箴周旋。乃事天休。雖至而不以爲喜。官局是專。而靡營其他。永矢捐軀。仰酬知己。



代謝施待制狀

昨以他郡寓家。便塗抵任。子居虔命之署。冷甚廣文之官。豈謂曲諒愚衷。過垂恩惻。俾沿臺牒。往促漕舟。皆緣公爲得遂私欲。獲挈賤累。盡歸巨庀。此蓋伏遇某官。盡物以誠。任仁于己。永言感服。曷究指名。

代謝二司狀

某到郡累旬。監州無狀。簿書弗整。管庫少嚴。製錦致傷。雖強學而安可。血指爲斲。蓋不能之使然。承攬轡之按臨。欲望風而引去。不時斥罷。盡出優憐。知無不爲。力圖拙者之效。死而後已。仰答仁人之恩。近阻高明。諒臻禧福。伏望順節自壽。協時所瞻。

代謝兩府狀

被恩至渥。冒職如初。俯伏拜嘉。兢慙失措。伏念某早緣曲藝。竊綴茂科。逢辰寡資。累日取進。躡領漕權之重。往當河朔之雄。方殫鄙才。思稱繁使。而所屬列郡。非良長人。致狂寇之不咸。嬰孤城而自守。不能慮事而先。猶徒爾傾忠。于已萌。賴廟算之萬全。破寇巢于一舉。私心俟黜。恩典從寬。止奪使麾。尙叨守紱。雖頻年易郡。未始滿期。而南服按刑。僅諧累月。豈圖明命。復眷孤蹤。官改外臺。俾還舊物。蓋使過者欲功之勉。嘗失者知得之榮。靖言忝塵。厥有緣自。此蓋伏遇某官。代天敷化。當軸均仁。匠物謂無可捐。器人容有不能。卒令鷲質。仍玷龍光。敢不究悉事權。激昂志尙。少圖拙者之效。庶答大鈞之私。

代到任謝兩府狀

比者就蒙細劄。移領善邦。望闕非遙。假麾何幸。竊念某本由平進。親遭盛期。累日而取官資。固無他術。應宿而居郎位。誠玷茂恩。而復頻易左符。率遷喬木。唯泗封之故郡。實淮服之會區。曷稱衰遲。輒當繁要。此蓋伏遇某官。代天敷化。與物終仁。昇分外補之榮。曲盡大君之賜。敢不周旋。乃職。黽勉在公。永矢捐軀。仰酬知己。某下情無任感懼。激切之至。

### 代謝諸官狀

茲以短才。猥當煩使。叢然財賦之供億。乘以簿書之冗紛。徒爾傾風。末由奉記。豈圖情照。首貺音滕。意在遠而彌親。禮由謙而益厚。仰銜勤抑。第切銘藏。歆溥云初。標儀尙邈。勉綏寢饋。前對寵榮。

### 代謝轉官狀

帝饗告成。德音申諭。泛均洪澤。施及冗員。被寵匪叨。拜嘉知愧。伏念某本由曲藝。進冒茂科。早緣幕廷。寢踐閭籍。止圖累日之效。以致列星之聯。豈謂禮訖總章。慶覃列位。或講求曠典之舊。或侍從嚴祠之勞。此而例遷。固匪虛授。若茲忝據。良自夤緣。此蓋伏遇某官。素勗霽期。致階榮漸。卒令駑獘。亦玷龍光。敢不加慎。操修。益思樹立。上酬天造。次答已知。舍是而他。不知所措。

### 代謝二司狀

露章易郡。得請還朝。獲遂私誠。將違公庇。怔惶承命。喜戀裝懷。伏念某在苒外。靡徘徊路末。力圖爲政之效。日抱瘵官之虞。重以迎侍安輿。阻遙故里。雖竭晨昏之奉。殊乖羞膳之宜。然君父之命已行。弗宜數改。

而人子之心未盡。因用上陳。豈謂睿慈俯從愚欲。此蓋伏遇某官。素垂大惠。曲軫孤蹤。贊行軫物之仁。使就養親之便。永惟感幸。曷究指名。

代得替謝上司狀

術短事叢。地卑郡要。知庭闈之奉養。有風土之乖殊。弗便旨甘。遂形懇請。願除便郡。以就私誠。露章方聞。俞詔隨下。矧爾更書之代。將違蔭宇之醴。得免官瘵。卒以理去。靖言所自。厥有由然。此蓋伏遇某官。早借題評。俯矜樸直。靡尤庶物之曠。曲示兼容之優。獲解守麾。俯行鱸之入覲。回瞻恩館。惕感涕之無從。

代謝提刑狀

近以露章宸冕。卜兆親塋。因緣盡室之還。將就乘舟之便。爲謀弗熟。引慝固多。值使旆之按刑。呼篙工而詰問。仍移牒命。俾述事端。雖勉開陳。尙虞舉劾。豈謂靡尤既往之過。特寢必行之文。此蓋伏遇某官。量極兼容。仁推再造。念效官四紀。粗守於謹廉。使竊寵一麾。獲全於榮幸。欲報知己。敢辭捐軀。

謝兩制狀

祇奉明縉。就叨寵寄。京畿近服。邦漕重司。併集茂恩。驟加庸品。竊以爲國領計。須官得人。餽輸中都。不腴民而厚上。澄序庶位。不簡賢而附權。具是兼長。乃名宜職。苟容竊位。曷弭公言。某效局無堪。瘵官有素。江淮易任。曾靡寧居。金穀主謀。悅迷舊習。豈謂浩繁之委。不遺孤冗之蹤。此蓋伏遇某官。言味借優。褒華引重。振拂汗滯。矜憐介愚。寢聞當辰之聰。遽復外臺之命。敢不周旋。乃事恪慎。厥修永矢。捐軀仰酬知己。

又

謬被恩縉。出提憲局。才輕責重。寵至憂深。竊惟庶獄之原。動繫生民之命。雖詔條所約。深慎于吏文。而州縣之間。或違于上意。因精使者之選。以董欽哉之刑。必得周才。乃名宜職。竊念某職非經遠。品不及中。襲鉛槧之遺芬。粗求寸效。究簡書之深意。都味舊聞。就領僻官。尙虞墮職。矧在淮州之劇。尤稱犴獄之繁。此而按章。誠曰假寵。靖循忝冒。厥有階緣。此蓋伏遇某官。言味借優。褒華引重。振拂汗滯。矜憐介愚。寢聞當展之聽。俾預外臺之寄。敢不持存平允。考察濫冤。永矢糜軀。上酬知己。

代謝王舍人狀

遯阻風猷。寢更年所。日爲簿領之關。掌坐致音書之闊。稀方切傾賢。遽蒙下教。感與忭會。情鈞禮優。恭以某官。素練善經。洵揚臚仕。沈毅有略。不廢壺歌之懽。嘯聚自潛。已絕萑苻之警。果凝顯烈。驟陟榮班。某處事弗精。瘵官是懼。尙蒙寬假。不汝瑕疵。去德未遙。佩恩良極。

代謝許發運狀

某一竊科籍。久糜祿鍾。累日而取官資。固微他術。應宿而居郎位。誠玷茂恩。向叨郡絨之榮。越隸使臺之屬。罄殫拙效。訖乏最稱。逮秩滿以還朝。仍便麾而假守。靖言忝冒。厥有階緣。此蓋某官。爲容有先。增價十倍。卒令駑獘。亦被龍光。敢不佩服攸箴。周旋乃事。庶幾一得。云補萬分。永矢捐軀。仰酬知己。

代謝經過諸處官員狀

近沿臺牒。獲道治封。上謁賓除。屢遭賢規之粹。交謹宴俎。過蒙主禮之優。還局而來。息肩未暇。復往推於詔獄。因曠奉於音滕。尙賴寬明。弗加疵咎。伏惟歆炎貫序。福履餐和。諮款寢遼。傾瞻曷旣。益綏燕起。前對褒升。

代謝王副樞答書狀

近者伏聞某官。光膺徽冊。參掌繁機。增天子得賢之稱。副大臣行道之實。幅員億姓。咸託於鈞陶。藩翰下寮。竊形於距躍。因傾愚悃。上浼台光。豈謂公輔量寬。廟堂政暇。自忘絕禮。回貺鈞函。拜讀以還。兢榮失據。伏惟緝熙帝載。翕受天祺。恭以某官。王佐偉才。民靈先覺。高文大冊。蚤冠於雋科。華貫嚴途。游揚於聖世。備紆賢業。自結主知。密侍清光。益隆體貌。禁局視草。久屈將明之資。樞幄暢謀。聊分宥密之寄。行明縉之登進。職上袞之凝嚴。副國倚毗。協時瞻矚。

代謝許州相公狀

頃在三川。屢爲屬吏。第疲驚而自守。微銖兩之足甄。伏蒙矜憐介愚。終始振拂。預郎垣而竊寵。忝侯閫之亞塵。訖賴曲成。敢云自致。栽培之德。怵論報以無塔。樗散之資。復託蹤而得地。出入材館。貿遷歲筭。辭藝荒蕪。濫肩下客之列。禮遇優厚。率荷上臺之仁。會遷印於宰廷。方建塵於京輔。首錄門下之賤。俾綴仕階之榮。露章上聞。兪命隨降。弗由稽古之效。遽有進身之基。靖言載惟。厥有攸自。此蓋伏遇某官。大鈞播治。輿律吹枯。匠物謂無可捐。器人容有不備。是令茂渥。輒又鯁儒。棠棣微生。盡沾雨露之澤。鵲鳩翮品。皆緣

卵翼之恩。永矢糜軀。仰酬知己。

代謝中書狀

濫被恩。愈出司憲職。語能且薄。荷責惟憂。竊以國家。惇尚至仁。哀矜庶獄。治刑之吏。或舞於深文。抵罪之氓。間罹於密網。因重按章之選。俾澄濫罰之源。宜得敏才。以當繁使。伏念某。肖靈非粹。學古不優。早從朝弁之華。寢冒書林之目。以至分守符之寵。寄備王府之末員。罄竭鄙才。訖微善狀。優游一郡。思全嬾放之懷。董按列城。本非平素之望。靖言塵玷。厥有階繇。此蓋伏遇某官。翼亮天工。運平帝緯。器人容有不備。匠物謂無可捐。坦然至公。施及無意。敢不周旋乃事。恪慎厥修。誓殫一介之勤。少答大鈞之賜。

代謝李兵部狀

比緣厚幸。得備屬官。向因愚悃之傾。輒瀆使威之重。豈圖乘轉給之豐暇。忘爵德之達尊。俛顧下僚。特頒諄誨。仰佩一謙之美。第增三復之勤。恭以某官。元精所生。盛德之後。早躋纓紱之貴。自結續旒之知。總漕節之劇司。方圖顯效。復相門之遠躅。行被茂恩。

謝蔡學士狀

憲冥亡狀。汨沒于時。向補獄官。嘗備掾屬。轅駒局促。曾建議之弗明。市狗悲號。或賞音之間及。汨冗曹之滿歲。會卓馬之還朝。無何孤蹤。亦旅上國。天銓待次。殆困東方之飢。酒正乏員。遽叨北海之薦。靖言驚猥。曷稱甄揚。此蓋伏遇某官。興勸官能。助開公道。不遺簪履之舊。力提管庫之微。敢不佩服攸箴。周旋乃事。

護材六物。寅守于舊聞。第課三年。庶成于微效。

謝范陽軍司理狀

官舍接疆。日瞻高矩。客車過郡。時標美聲。思清晤以未涯。遽珍題之爲貺。恭以某官。才猷膚敏。方格淳修。一命開榮。尙淹于遠跡。上臺交薦。行蹈于亨塗。倍順節宣。少平頌願。

代謝文相公答書狀

蚤以孤單。素叨獎遇。訖被大鈞之賜。寢貳外塵之榮。旋去門墻。漫逾歲月。一身銜感。因罄敍于悃悃。兼幅瀆尊。懼目貽于罪戾。豈謂王公之量。曲惟犬馬之情。弗爾擯遺。親形誨諭。拜嘉至渥。論幸無涯。伏惟靜鎮大邦。具膺景福。恭以某官。天元間氣。王佐偉才。以忠誼結上知。以過德爲己任。畫一之歌。旣作。休有成規。太平之策略。行。翕臻至治。俄還宰印。出剖使符。幅員蒼生。望晉公之再入。旦夕徽冊。副周尹之具瞻。

代謝兩憲狀

某天資闇昧。胄系寒微。早挾片文。晚塵一第。脫略名場之困。間關仕路之榮。旋貳方州。適居要地。鮮嘗坐局。多所抗塵。間參決于簿書。訖無裨于課最。慙廉自信。卑瑣誰容。豈圖經世之才。方重按章之選。夙夜重寄。品裁庶官。隨器而任人。市骨而圖駿。以某外弗修于邊幅。內粗守于廉隅。諒其介愚。謂可甄拔。特邀露奏。上達邃旒。坦然至公。施及無意。靖言忖度。厥有階由。此蓋伏遇某官。樂育興懷。兼容成德。輕於慰薦。錄此屏庸。敢不持前所存。覲後有立。糜軀以報。知己難酬。

伏蒙特抗辟書。俾從藩服。匪才被獎。早度其難勝。成命未行。預虞於弗稱。惟治朝之故事。付帥府之要權。得舉賢材。以備官屬。眷乃題輿之請。最居推轂之先。贊行教條。關決政務。講兵民之利疚。考風俗之便宜。當取經通之流。以光慰薦之首。如某者。胄從寒薄。性得顯愚。局若轅駒。固建明之無所。欣如蠶蟄。第竊忤之爲多。伏遇某官。爲木先容。采葑下體。將令鷲猥。亦玷龍光。儻卵翼生成。獲繇於恩館。則頂踵酬報。不後於衆人。

### 謝府推學士狀

自去京都。亟來淮服。馳心翹館之下。回首長安之遙。仰企高風。倍增勞臆。恭以某官。德宏業巨。行潔文醇。由妙年而取甲科。不累日而踐華貫。早被溫書之召。入登祕館之遊。贊劇治于神畿。勢非久次。暢辰猷于禁署。議所同歸。願輔粹襟。行光寵數。伏惟瑣亞。倍百他倫。

### 謝李兵部狀

近以驟遠崇威。懼遺孤迹。媿向重知之地。尙懷未滿之心。因貢牋函。仰通几格。由誠計之迫遽。致言詞之壽張。謂塵將命之嚴。必冒瀆尊之咎。終朝自省。悸魄難安。曷圖大漕之崇。弗聞冗曹之細。益恢全度。曲究下情。謂夫以賤干貴者。蓋有欲言。由初及末者。方能成物。特寬罪斥。親賜教音。事絕舊聞。幸踰始望。惕焉下拜。藏以爲榮。兼審順履時暄。誕膺景福。恭以某官。早紓賢業。自結主知。言施當世而可行。名揭本朝而



甚白。連更重柄。未嘗坐席之溫。方總外臺。行被詔函之趣。還台衡之舊柄。光史冊之新書。庶俾屏庸。訖歸  
挺治。

代謝二漕狀

承乏于茲。字人未幾。官簿弗整。民瘼尙留。與錦使裁。雖強學而安可。血指爲斲。誠不能之使然。聞攬轡之  
按臨。欲望風而引去。不時警斥。盡出優憐。究悉寸心。誓殫拙者之效。周旋巨庇。庶免瘵官之虞。方遠使威。  
第馳愚悃。恭以某官。才兼庶品。名重本朝。綱紀列城之風。暫光主寄。發揮當世之務。行暢賢圖。伏望上爲  
邦家。精調寢饋。

代謝舉升陟狀

尸官下邑。才微分寸之長。被薦上臺。恩甚邱山之重。事踰望表。感劇愚衷。伏念某孤平之蹤。汨沒無狀。語  
能勿齒於俗吏。行已恐羞於古人。一竊祿鍾。偶逃官曠。再污縣紱。復避親嫌。曩從淮服之選。易宰江濱之  
陋。而且歲穰相接。民訟幾稀。鞭扑牒訴之罕。關懷賦租科斂之易。爲力顧何治績。足稱褒章。此蓋伏遇某  
官興勸官能。助開公道。諒其懦介。謂可甄揚。特屈知人之明。猥形躡等之舉。敢不周旋。乃職。佩服攸箴。永  
矢糜軀。仰酬知己。

謝知府少卿狀

長無寸才。寒有餘地。百里自效。職頗憚于不修。二天誤知。衆遂疑其可取。近具版謁。前從府趨。瞻榮戟之

燕俎之懽。千騎雍容。下臨所舍。十目駭愕。相視爲榮。事信越于前聞。心第藏于厚賜。下邑歸去。尙戀卿雲之濃。終朝度思。益知恩地之重。恭以某官。稟氣間傑。爲時老成。朝廷渴賢。方念元龜之舊。廊廟虛位。佇增顯爵之光。孤生成依。四海僉屬。

謝通判國博狀

某託庇歲餘。發蹤門下。散木成器。緊公輸之先容。駑馬爲良。由伯樂之回首。近白吏事。往趨恩闕。方守閩之通名。已倒屣而垂接。斂版長揖。爲降階墀之尊。虛襟相容。不知州縣之賤。以至燕觴延勞。騶御枉臨。泥塗生光。僚友改觀。守在民社。未幾告還。瞻言軒墻。猶有餘戀。伏惟協班寬詔。坐擁繁禧。恭以通判國博器完道醇。性潔文妙。雍容倅乘之任。豈曰盡才。頗頡書林之遊。此其宜職。伏望爲國自壽。以時考祥。

謝越州知府待制狀

蚤聽諸公之論。竊親盛德之光。位貌間殊。情禮疎絕。忱自進之無路。第仰高之有年。遽被上臺之符。俾論會府之秀。雖彈愚效。何裨勸駕之勤。比訖事經。方適拜塵之願。而大賢不自貴重。一介亦加采收。以至燕俎將恩。餞壺申貺。退銘盛遇。增劇丹悰。伏惟訟筭畫空。道環天粹。恭以某官。器函剛實。才貫幾深。允蹈古人之直清。喜言當世之利疚。旋躋延閣之祕。自結嚴宸之知。東南請麾。已諧均役之志。旦夕被詔。亟對登庸之休。四海共依。孤生非俊。

謝楊直講狀

近並諸君。謬程多士。曾是辭才之短。介于季孟之間。而甘辛好殊。藏否蜂起。人執一見。誰將適從。實鑒定鑒之精。與決羣言之惑。卒多彼彥之在選。獲道有司之弗明。終朝度思。受賜深矣。復緣賤子之跡。嘗出先公之門。掩其頑蒙。陰有憐獎。逮單車之亟引。遡翹館以增勞。伏惟贊行寬條。翁受純福。恭以某官薦紳碩望。名世偉才。學造聖賢之微。文經邦國之要。貳東南之巨屏。猶鬱羣瞻。陟左右之嚴塗。乃云宜職。伏望爲國自壽。副時所傾。

謝陳秀本狀

發詔羅俊。命卿辨才。代審一摠妙文。旋中異等。遠躋此始。私心竊懼。首貽長牋。尤識厚誼。陳君卽先輩氣得秀粹。學探本原。諒竊祿鍾之榮。勉從貢部之式。華歲方盛。致身其時。青雲在前。舉足可到。永言欽頌。曷罄懽愉。

回劉侍郎生日詩狀

五十富貴。偶同治越之年。八千春秋。難辱借秦之諭。珠璣可玩。瓊玖是慚。空積感懷。莫知報禮。

謝富丞相狀

比者祇被恩書。與持計節。寵幾于冒。分失其安。伏念某偶席世資。罔通時用。介愚既定于所稟。矯揉雖勞。而莫移。矧策足于冗塗。固絕心于要路。向會高明之當國。一隨長短以取人。緣是孤孱。亦叨獎拔。承財闡

之官乏。何所建明。佐神甸之治經。終然暗拙。懇求外補。止覬小麾。曷圖造物之仁。弗顧假人之議。遽以煩使。屬之短才。既假漕臺之劇權。又分淮服之近地。無桂玉之憂。足以致舉家之溫飽。有海陸之產。足以奉偏親之旨甘。實私懷之便安。第官責之深重。按列城之吏狀。要在澄清。籠一道之地財。抑資幹濟。當竭慮。以酬誤恩。載惟單跡之生成。率自大鈞之終始。卽具舟楫。益遙門墻。絃感臆以無從。企台光而增戀。恭惟某官。器包民極。勳濟王塗。挾重計以尊本朝。履正德以儀庶位。三辰以軌。百化其凝。公路倚平。暢偉謀于當世。親聞棄養。纏巨痛于終天。愈隆注意之私。屢降奪情之詔。雖力祈終制。靡循方進之故常。而久鬱具瞻。深跂晉公之再入。狀望節哀順變。視履考祥。上副廟朝之依。下平海宇之願。

謝賜酒食狀

僕馬瘡勞。暫遂寧居之適。酒肴豐旨。兼蒙飫賜之加。戢感良深。諭言匪悉。

謝館燕狀

竊冒使華。肅將君命。屬征驂之稅鞅。卽候館以肆筵。祇服恩勤。第增感戢。

謝合食酒果狀

邦家脩睦。慶歲籥之履端。肴核優賓。參壺漿而申貺。仰承嘉惠。增戢愚衷。

謝春盤幡勝狀

歲功遙起。春物滋榮。製妙飛幡。動鏤花于剪綵。珍叢多品。錯絲菜于雕盤。併此拜嘉。惕然萃感。

謝生餼狀

車馬少休。方諧定館。餼牽並賜。迴越授餐。匪頒之禮。旣優。荷戢之懷。良劇。

謝射弓御筵狀

燕儀示惠。過蒙折俎之私。禮射序賓。曾乏主皮之善。其爲媿幸。無諭感銘。

謝餞筵狀

輕輶載飭。將事千征。嘉豆旅陳。遽叨式宴。良厚使廬之眷。特加祖軼之勤。祇佩弗忘。敷論罔旣。

燕京謝酒果狀

遠駕單車。甫經別甸。特念行人之至。重煩使者之臨。均沾玉笋之清醪。兼雜秀林之珍實。仰承優賚。增戢鄙懷。

上李刑部狀

頃在親喪。嘗經治部。名屢達於將命。遇迥殊於衆人。旋承卓馬之朝。入覲蒼龍之闕。俛惟賤迹。時旌於上。京適會輜軒。遠使於絕域。第傾德宇。阻叩賓筵。賴幸會之猶然。績恩暉而有所。周旋侯幕。方備於下僚。密邇遠塵。復爲於屬吏。愧營職之無狀。致貢書之不時。仰歧標儀。坐勞悚臆。恭以某官。夙鍾間氣。親遭熙辰。秉忠諒之一心。出誠明之正性。固合住宅元輔。陶成太和。本朝以漕權之艱。淮服爲最。兵興調度之供億。地賦詔求之浩穰。庸資兼才。以領大計。然外臺分寄。誠鬱於具瞻。矧中辰須賢。行膺於爰立。伏望爲國自

重以時納休。

上知蘇州蔣密諫狀

近修板謁。獲叩坐隅。伏蒙忘位貌之霄泥。錫燕私於樽俎。間沾豐品。申覘名醪。揆恩禮之踰常。浹肌骸而盈感。奔馳吏役。邈矣一涯。契闊台光。倏焉累日。愧營職之無狀。致貢書之不時。伏惟鎮撫善藩。綏寧泰宇。恭以知府密學諫議。夙鍾間氣。親遭熙辰。秉忠諒之一心。出誠明之正性。優游訟樹。密邇恭桑。圭袞儻來。靡嬰於素志。江山有助。不廢於清吟。伏望爲國自重。以時納休。

代上李度支狀

向擁州旗。曠馳書舍。伏惟贊司邦計。妙順生經。恭以某官親會熙朝。游揚美任。佐大農之調度。方委於周才。邇中辰之聰聞。行歸於劇任。

代上呂狀元舍人狀

伏審茂對恩書。榮躋法從。伏惟慶慰。恭以某官業術精奧。方格淳修。學足以挹軻雄之源。行足以蹈淵騫之軌。親逢文雅之會。優冠秀廉之科。華要游揚。聲光愈綽。方載言于宸扆。俄給札于禁林。有文章溫厚之才。能體詔意。代誥令坦明之作。遽當上心。佇見追還三代之醇。遠駕二京之右。少見儒效。卽歸宰司。某頃吏邑封嘗棲蔭宇。側聞新命。增忭寸襟。

代上范資政狀

伏自某官就奉制音。往觀藩政。門墻愈遠。慮違冗賤之蹤。牋牒不時。懼浼高明之聽。伏惟靜班寬詔。誕擁純禧。恭以某官王佐偉才。民靈先覺。忠言坐斷乎國論。大筆追還于古風。領樞廷之弼謨。專將闔之節制。備紆賢業。獨映朝端。旋升祕殿之華。益重嚴宸之眷。幅員億姓。已躋富壽之區。藩屏一方。聊布中和之治。行圖舊德。還宅元台。會是儒微。素叨知獎。特矜孤進之自力。畢大鈞之仁事。雖忱于命違。恩固踰於衆遇。更繫誕造。以託生成。

上永興路監司狀

叨從帥幕。將預戎機。才無一長。顏有餘愧。某其少也賤。乃今之愚。治曲學而不根。經遠猷而恐泥。他技俱短。獨潛圖吏之精。自知甚明。僅給簿書之務。若建都之舊地。重開府之盛游。主人仁賢。僚友俊茂。應抗章之辟置。往廁其間。須主畫之該詳。密裨于內。笑談足奉於多暇。牋檄皆如其欲言。縱橫智謀。出入方略。若此之比。率非所能。尙繫官局之居。適託使臺之庇。致孤生之冒選。良本爲容。昧素術於從軍。願前承教。據依有所。欣幸兼常。

代上判府劉龍圖狀

武政小邦。瞻風上笏。屬秋商之貫序。仰福履之餐和。恭以某官經世偉才。搢紳碩望。忠言坐斷乎國論。大雅追還于古風。中外游揚。明哲一致。迅躋內閣之貴。益重嚴宸之知。京邑四方之表儀。翕騰於尹政。宰廷百辟之師帥。當被於朝僉。咫尺聰聞。旦夕眞拜。

代上催綱王太傅狀

向嬰藩守。阻奉郵音。仰計水行。妙熙谷養。恭以某官。稟氣間傑。爲時聞人。掌禮局之儀。深明於典故。促漕臺之運。方藉於幹能。行疇茂庸。驟陟華貫。伏望上爲宗社。精調宴興。

代上通判陳太傅狀

自遠風符。洊更年籥。川壤攸阻。緘騰幾稀。伏惟贊行教條。翁受禧福。恭以某官。量函夷雅。學際本元。侯闔亞塵。尙淹於遠躋。相門襲慶。當繼於先芬。伏望上爲邦朝。精調寢餼。

代上楚州監酒洪推官狀

日傾高誼。斗曠幽緘。迷料燕寧。妙符生理。恭以某官。藝文精奧。方格淳脩。坦坦榮途。固宜於闊步。區區利局。誠鬱於遠途。佇善課之告成。卽寵恩之躡等。更祈珍嗇。少慰顯瞻。

代上運使李刑部回衙問候狀

伏審出按屬城。近旋崇飾。仰惟吉履。俯萃醴休。恭以某官。親遘聖辰。備紆賢業。登車攬轡。已澄敍於官聯。輓粟飛芻。復羨盈於邦計。行旌幹濟。驟陟凝嚴。伏望上爲闕廷。精調寢餼。

代上知郡郎中狀

近者屢布音函。繼紆誨牘。屬餘寒之未殄。諒冲履之惟休。恭以某官。方格淳脩。政能通敏。守麾頻易。率揚循吏之稱。時議翕歸。尙起潛郎之歎。佇凝顯績。行被茂恩。瞻奉尙遙。傾祈倍切。



上知郡都官狀

自去公庠。鎮靡吏役。日尸鞭扑之囂。冗坐致音。滕之闊稀。伏惟入對王休。備據賢蘊。神觀靜復。天和舉臻。恭以某官。迪氣純全。賦才肅給。守靡滿歲。方格上聰之聞。使節宣風。行膺外計之委。俛惟屏懦。永託甄題。伏惟上爲邦家。精調寢饋。

又

解麾南服。奏課中宸。藐如嬰兒。驟奪慈母。茶若疲馬。止思故軒。仰跂恩暉。第零感涕。惟齋舡之遐遯。固德宇之中安。恭以知郡都官。才貫幾深。器函剛實。政不火烈。民自畏之心。猶衡平事。罔欺者。行光循吏之目。親受聖王之知。匪朝甄躋。協時傾屬。某短才初仕。嘗備於使令。裕度兼容。靡尤於鈍拙。更繫餘末之庇。曲保孤單之蹤。不由他門。以畢大造。伏望上爲邦社。精調寢興。

代上府推學士狀

望闕雖邇。瞻風甚勞。伏惟視治多餘。練神增爽。恭以某官。量函夷雅。識貫幾深。親奉盛期。獨膺華貫。書林擢職。方贊畫於王畿。法從須賢。行拜嘉於宸陛。